

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana eġa ita riweta. Wate tauviararamana e ririwa da Mark i girumi. Mark, lamna eġa Apasol, wate tauviararamana maġamaġau i notai da tauna, Peter maiteni au Rome i mae. Ma Peter, Iesu ana kua ma ana viararamana maġamaġau Mark i riwei. Anina ma Mark wei riwana i girumi da tauvitumaġana au Rome ita aramanei, Iesu aiwai i kauai.

Riwa karena i girugirumia e vivieġeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kua maġamaġau ita kauai. Wei kauai tana inainai maranai: e viviararamana; ma arua-apoapoei e viviaġaġana-opunei; ma rava doridoriai e vivilawani; ma ġo'apoapoe e notanota tawanei. Mark, Iesu ana nola ma ana kua i girumi ma eġa ana viararamana ita girumaguratei. Mark i vieġeta menanare Iesu au korosi i'raġe da rava anatapui ita vilawanai ma God menanare, Iesu iraġalei i vovaimairini.

*John Taubabataito, Iesu ana aninae
i vovokaukauai*

(Matthew 3:1-12; Luke 3:1-18; John 1:19-28)

¹ Wei lamna Iesu Keriso Messiah God natuna Riwana Aiaina karena.

² Wariaḡa peroveta Isaiah i girugirumia nanare:
 “Ona rautaniḡana! Au peroveta au naom
 ana paritawanei
 da am aninae ina vokaukauei.” (Malakai 3:1)

³ ☆ “Peroveta au mutulua e viviḡoreḡore:
 ‘Taumi BADA ana aninae ona vokaukauei,
 ana eta ona vovai-jijimani!’ (Isaiah 40:3)

⁴ Ma taupariverena John i nei au mutulua da rava i babataitōi ma God riwana i jimejime i pa, “Ami ḡo’apoapoe ona voterei, ma ona mae-taviremi God awarina ma ami ḡo’apoapoe ina nota-tawanei ma ana babataitoimi.” ⁵ Ma rava anatapui Judea au paratana ma au Jerusalem i nae da John ita rautaniḡanei. Maranai ai ḡo’apoapoe i rupeni, John, tau i babataitōi au waira Jordan.

⁶ Ma John, *kamel* aparana metametanana i oteoteni ma ana tairoro ḡamoḡamo opina. Ana lam kapau ma manigewa. ⁷ Ma tauna, rava i ririwei i pa, “Rava au muriu e nenei i ḡetelara, eḡa me tau. Eḡa tagotagogiu da ana ae uma ḡuravana ana rupeni. ⁸ Tau wairei a babataitoimi, wate tauna, Arua Vivivireinei ina babataitoimi.”

John, Iesu i babataitōi
 (Matthew 3:13-17; Luke 3:21-22)

⁹ Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitōi. ¹⁰ Ma maranai Iesu wairei i ḡeḡetai, i nana da mara i wanatawanei ma Arua Vivivireina me gabubu i ḡairai. ¹¹ ☆ Ma God ponana

☆ 1:3: Isa 40:3 ☆ 1:11: Gen 22:2; Isa 42:1; Mrk 9:7

marei i opu ma i riwa i pa, “Tam, tau natu au nuavaina ma u vinuaiainiu.”

*Satan, Iesu i raelari
(Matthew 4:1-11; Luke 4:1-13)*

¹² Ma lamna au murina God Aruana Vivivireina Iesu i paritawanana-opunei au mutulua. ¹³ Ma au pom 40 au mutulua i mae. Ma Satan, tauna i raelari. Ġamoġamo ġaiġaiawai nai au dobuna i mamae ma God ana anela marei tauna i paini.

*Iesu, lebalebaġai ruaġa ma ruaġa i raukwatuei
(Matthew 4:12-22)*

¹⁴ Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimei. ¹⁵ Ma Iesu i ririwa i pa, “God ana mara vinevinena i ġetai. God ana vibadana vouna rava aubai, lamna i turiai. Ami ġo’apoapoenana ona rupeni ma ona mae-tavirem ma Riwana Aiaina ona vitumaġanei!”

¹⁶ Mara tagogi Iesu Galili topana au gerana i bababara nae. Ma lebalebaġai ruaġa i ’nanai, Simon* ma ana tevera Andrew au topa i rarauagida. ¹⁷ Iesu i riwei i pa, “Ona nei ma ona votaġotaġoiu. Ma me marina iana o tutuarui; nanare, ana viararamanimi da rava ona tuarui da ina vitumaġaneu!”

¹⁸ Ma maratogogi ai agida i voterei ma Iesu i votaġotaġoi. ¹⁹ Ma tau i gera i verau-nae. Iesu, Zebedi natunatuna i ’nanai, James ma John ai au waga ai agida wanawanarorona i vokaukauei. ²⁰ Ma maratogogi tau i ġorei, “Taumi ona nei ma

* **1:16:** Wavana ġelauna Peter

ona votaḡotaḡoiu!” Ma tau i amai Zebedi† ana taunola maiteni i voterei ma Iesu i votaḡotaḡoi.

Iesu, arua-apoapoena rava awarina i viaḡaḡana-opunei

(Luke 4:31-37)

²¹ Iesu ana Tauvotaḡotaḡo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei.

²² Tauna ana rewapanana i viararamana eḡa me mai Jew ai tarawatu babadai § nanare. Ma tau-rautaniḡana ana viararamana i baiei.

²³ Maranai Iesu pari au numana i viviararamana ma oroto arua-apoapoena orana i rui ruinia i garara ²⁴ i pa, “Iesu Nasaretei, aiwai e ḡoeḡoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

²⁵ Ma Iesu riwa bagibaginei i riwei i pa, “Ma genuana! Nai orotona ma opu-tawaneii!”

²⁶ Ma arua-apoapoena orotona i viaikwajiei ma ponana i rata, i garara ma i opu-tawanei. ²⁷ Ma rava anatapui i bana-kauei ma tau i ava i vitarapiri, “Wei aiwai? Wei viararamana vouna ma ana rewapana maiteni! Wei ravana awarina rewapana e mamae da arua-apoapoena i riwei ma tauna i vovoteletelei!” ²⁸ Iesu nolana, maratagogi i tua Galili au anatapuna.

Iesu, rava maḡamaḡaui i vilawani

(Matthew 8:14-17; Luke 4:38-41)

† **1:20:** Eng. Zebedi. ‡ **1:21:** Eng. Capernaum. § **1:22:** Wariaḡa BADA, ana Tarawatu Moses i verei mai Israel aubai.

²⁹ Nai marana pari numana i opu-tawanei ma ana tauvotaḡotaḡo maiteni i nae Simon ma Andrew ai au numa. James ma John maiteni i nae. ³⁰ Simon poiana wavinena ini ḡuḡurana ana au animatave i matamatave ma maranai Iesu i ḡeta ma numa ravai, tauna i parivere. ³¹ Tauna i nae wavine awarina, nimana i vojijini ma i voagui da i vomairi. Lamna maranaina, ini ḡuḡurana i voterei ma wavinena, tau i paini.

³² Ma au bigai madeḡa i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.* ³³ Ma rava anatapui nai au melagaina i vitagogiei numa au metaetana. ³⁴ Ma Iesu, maḡamaḡau ai doria nununai i vilawani ma arua-apoapoe maḡamaḡau rava awari i viaḡaḡana-opunei. Ma arua-apoapoena i aramanei da tauna anina God natuna ma lamna aubaina tau i viḡaei da i genuana.†

Iesu au Galili i raugugula nae
(*Luke 4:42-44*)

³⁵ Ubaubanai boiboḡi, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari. ³⁶ Muriai, Simon ana rava maiteni i nae da i baiei. ³⁷ Ma maranai Iesu i nelaḡai, ma i riwei i pa, “Rava anatapui e baibaieim.”

* **1:32:** Madeḡa ina neulai au murina anona lauvitau ana mara damona. Mai Jew ai lauvitau ana mara au Friday madeḡa e neneulai au murina e vivikarei da Saturday madeḡa e neneulai au murina e vorovorovei. † **1:34:** Iesu i aramanei, mepa da ita kauēi da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viḡavia, me tau i vivinua-notenotei nanare. Jhn 6:15 ma inana.

³⁸ Iesu i paribelei i pa, “Tana nae taon ġelau i au ġereġere, ma kampa maiteni God Riwana Aiaina ana raugugulei. Tau wei lamna aubaina a nei.”
³⁹ Ma Galili au anapuna i naeni ma pari au numai i rarauugula ma arua-apoapoei i viopuni.

Iesu, oroto opi dorianana i vilawani
(Matthew 8:1-4; Luke 5:12-16)

⁴⁰ Anina ma rava awarina opi dorianana, i nei Iesu awarina ma au naona ipeu ma iraudune ma agu i vibaġei i pa, “Mepa da ma ġoei, anina da ma viaiainiu.‡”

⁴¹ Ma Iesu nuabola orana i oai ma urana i viloloi da i vodadani ma iriwa i pa, “Anina a ġoeġoei, ma aii!” ⁴² Ma maratogogi opi-dorianana, oroto i voterei ma tauna i aii me. ⁴³ Anina ma Iesu i riwana-guratei i pa, ⁴⁴ “Tam ma nae! Aiwai i tuputupua awarim, eġa rava ma vieġei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kau ei da ina vimataira tau i awari! Pirisi pulo tauapuina ana vianina ina verei da tam u lawana.”

⁴⁵ Wate orotona i nae ma aiwai awarina i tuputupua lamna melagai au anapuna i babaniana-naiei. Ma lamna aubaina Iesu melagai anapui i vorei ma mepa eġa rava ita mamaelana kampa i nae. Wate rava mepa maemaei i nei Iesu awarina.

‡ **1:40:** Mai Jew ai Tarawatu e ririwa da rava lepeleperai, tau miramirai me dobu ġela ravai - Jentail. Mai Jew amapo nai ravai eġa ina vodadani. Rava miramirai eġa maiteni ina vitaparoro bo au melagai ina mae. Lamna aubaina mepa da rava miramirana i lawana, tauna ina ai-me, God tauna ina vaimeli ma rava maiteni ina mae ma ina taparoro.

2

*Iesu, oroto gwaḡagwaḡana i vilawani
(Matthew 9:1-8; Luke 5:17-26)*

¹ Iesu ana tauvotaḡotaḡo maiteni i wanavira-melei au Capeniam. Ma au pom ruaḡa au murina, rava nolana i nonori da tauna i nememei au melagai.

² Ma rava maḡamaḡau i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei.

³ Nelara ruaḡa ma ruaḡa, oroto gwaḡagwaḡana rasirasiei i avarai da i neiai Iesu awarina. ⁴ Rava i maḡa guratana ma eḡa tagotagogina da ita neiai Iesu awarina, lamna aubaina da tetelei i amḡaena da au poewa ma gavogavo i bauni ma kampa gwaḡagwaḡana ana rasirasina i tere-ḡairei Iesu au naona. ⁵ Ma Iesu, nai ravai i 'nanai da ai vitumaḡana i rata, lamna aubaina gwaḡagwaḡana i riwei i pa, "Natu, am ḡo'apoapoei, a nota-tawanei."

⁶ Anina mai Jew ai tarawatu babadai ḡelau kampa i kiakiala, au orai i vinua-notanota i pa, ⁷ "God ainelana ḡo'apoapoei e notanota tawanei. Aiwai aubaina wei ravana nanare e bababani? Tauna, God e vivijiboḡi ma e ririwa da tauna, God nanare."

⁸ Maratagogi, Iesu Aruanei ai nota i vaia ma i riwei i pa, "Aiwai aubaina wei kauai o vivinua-notenotei? ⁹ Metauna i telatela: ḡwaḡagwaḡana ata riwei, 'Am ḡo'apoapoe a nota-tawanei.' Bo ata riwei, 'Ma vomairi, am animatave ma vaia ma ma babara?' ¹⁰ A ḡoei da taumi ona aramanei da Rava Natuna au dobu ana rewapana e mamae da rava ai ḡo'apoapoe ina nota-tawanei ma ina vilawani." Ma gwaḡagwaḡana i riwei i pa

11 “A riwem, ma vomairi, am animatave ma vaia ma ma nae au numa!”

12 Orotona i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, “Tauai eġa melanai kaua wenanare ata inanai!”

*Iesu, Levi i kwatuei
(Matthew 9:9-13; Luke 5:27-32)*

13 Iesu, Capeniam i voterei ma Galili topana au gerana i bababara ana tauvotaġotaġo maiteni. Ma patara i nei awarina ma tauna God riwana viararamanana i vikarei. 14 Ma i verau-nae aburuna ma Apius* natuna Levi i 'nanai, ana bagibagi au gabuna i kiakiala ma *tax* i tamitami Rome gabemanina aubaina. Iesu i riwei i pa, “Ma votaġotaġoiu!” Levi i vomairi ma i votaġotaġoi.

15 *Tax* tautami ma ġo'apoapoei ravai maġamaġau, Iesu ma ana tauvotaġotaġo i votaġotaġoi. Ma anatapui, Levi ana au numa i kiala gogona ma i amam.† 16 Tarawatu Babadai ġelau lamna Pharisi, ma tau i 'nanai da Iesu *tax* tautami ma ġo'apoapoe ravai maiteni i amam. Anina ma Iesu ana tauvotaġotaġo i riwei i pa, “Aiwai aubaina Iesu *tax* tautami ma ġo'apoapoei ravai maiteni e amam?”

17 Ma maranaġ Iesu wei riwana i nononori ma tau i riwei i pa, “Rava lawalawai, doketa eġa ita ġoeġoei ma rava doridoriai, doketa e ġoeġoei.

* **2:14:** Eng. Alphaeus. † **2:15:** Moses, BADA ana Tarawatu i girumi ma mai Pharisi wei Tarawatuna i votaġotaġo-kauei. Ma tau kaua waduboi amamai ġariei maiteni i vovoteletelei ma i riwa da aiavoi Tarawatu eġa ita voteletelei lamna tau rava apoapoei, ġo'apoapoe tau kauei.

Tau a nei *gō*'apoapoei ravai aubai ma *eā* rava jijimani aubai."

Uji vitaraviravirana

(Matthew 9:14-17; Luke 5:33-39)

¹⁸ Mara tagogi, John Taubabataito ma Pharisi ai tauvota*gō*ta*gō* i ujiuji. Ma rava *gē*lauri i nei Iesu awarina ma i vitara-virevirei, "Aiwai aubaina John Taubabataito ma Pharisi ai tauvota*gō*ta*gō* e ujiuji, wate tam am tauvota*gō*ta*gō* *eā* ita ujiuji?"

¹⁹ Iesu i paribelei i pa, "Taumi o notanotai da tau aiavoi i raukwatuei tavine ana au torela, ina mae lota bo? *Egā*teni kaua! Maranai tavitavine vou orotona, tau maiteni e mamae, tau *eā* ina uji.

²⁰ Wate mara ina *gē*ta maranai tavitavine vou orotona ina vaitawanei ma lamna maranaina ana rava ina uji."

²¹ Ma riwa e mamae, "*Tau kaua vouna a nei ai eā me taumi ami kaua wadubona nanare.* *Eā* ai ai ravana, gara vounei gara au wadubona ina poporatu da gavogavo ina vopotai. Mepa da nanare lamna, gara vouna gara wadubona ina roro ma gavogavo ina rata. ²² Ma nanare, *eā* ai ai *wine* vouna ina vaini da *wine* aniterenana wadubona *gā*mo*gā*mo opinei au orana ina iwa*gī*. Mepa da ina kauei, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni‡. Wate *wine* vouna, anina da *wine* aniterenana vouna au orana ina iwa*gī*."

Iesu ana riwa Sabat aubaina

(Matthew 12:1-8; Luke 6:1-5)

‡ **2:22:** Wine e tuputupua ma puropurona wine ana aniterenana ina viaisikasikai

²³ Mara tagogi au Sabat, Iesu ana tauvotaḡotaḡo maiteni, *witi* wapuna au orana i nenaē. Ma ana tauvotaḡotaḡo *witi rovei* i vaini ma i amam. ²⁴ Pharisi ḡelau i 'nanai wei kauana i kaukauei ma tau i Iesu i riwei, “Ma inanai, ata Tarawatu e mamae da Sabat, lamna lauvitau ana mara. Aiwai aubaina tau i vovobagibagi?”

²⁵ Iesu i paribelei i pa, “Me peroveta i girugirimia nanare. David ana tauvotaḡotaḡo maiteni am-iraḡe ma aiwai i kauei? Taumi o iavi ma aiwai aubaina anona, eḡa ota vinua-notenotei? ²⁶ ✧Pirisi Ḣeḡetelarana Abiathar ana au mara, David, God ana au numa i rui ma palawa vovivirana i vaia ma ḡelau ana tauvotaḡotaḡo maiteni i verei da i ani. Moses ana Tarawatu e mamae da pirisi ava palawana e aniani.”

²⁷ Ma Iesu ana riwa au damona i riwa i pa, “God, Sabat i kauei da rava voaguna aubaina ma eḡa rava ita kauei Sabat voaguna aubaina.

²⁸ Ona vinuanotenotei, tau Rava Natuna, lamna aubaina tau anina Sabat badana.”

3

*Iesu, Orotu urana irairaḡena i vilawani
(Matthew 12:9-14; Luke 6:6-11)*

¹ Mara ḡelauna au Sabat, Iesu i naeme au pari numana ma oroto urana irairaḡena i 'nanai kampa i kiakiala. ² Ma Pharisi ḡelau i ḡoei da aiwaiei Iesu ita viwavui. Lamna aubaina i 'nana-taḡotaḡoi da oroto ita vilawani bo eḡa au Sabat. ³ Ma Iesu, orotona i riwei, “Ma nei, au naoi ma mairi!” ⁴ Ma Iesu, ravai i vitara-virevirei i pa, “Sabat au marana,

✧ 2:26: 1Sa 21:1-6

metauna i aii: Aiaina tana kauei bo apoapoena? Tana vilawana bo tana viraġena? Tarawatu aiwai i riwei?” Ma anapui i genuana. ⁵ Iesu ana amlogaiġaina i 'nana viravira ma i 'nanai da tau i orai i bado ma nuanuana i bola-kauei. Ma orotona i riwei i pa, “Uram ma viloloi!” Ma i viloloi ma i lawana. ⁶ Ma Pharisi maratagōgi i opu ma i nae Herod ana rava awarii* ma ai oga i tarai da Iesu mena ita viraġenei.

Iesu, Patara awari i babani

⁷⁻⁸ Iesu ana tauvotaġotaġo maiteni, tau i netawane ma i nae au gera da ita vilauvitau; ma mai Galili patara ġaeġaena i votaġotaġo. Rava maġamaġau, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ġelau waira Jordan taon au babagelauna, Taia taon ma Sidon taon,† tau anapui i nei Iesu awarina. ⁹⁻¹⁰ ✧ Iesu, rava maġamaġau i vilawani. Ma lamna aubaina doridoriai maġamaġau i viviamdudu ma i ġoei da tauna ita vodadani. Lamna aubaina ana tauvotaġotaġo i riwei da waga i vokaukauei. ¹¹ Maranai, arua-apoapoei rava au orai maemaei, Iesu i 'nanai ma au naona i peu ma i garara, “Tam God Natuna!” ¹² Ma Iesu tau i viġaei da avena ita vieġa da tauna aiai.

* **3:6:** Herod ana rava anona lamna mai Jew ai boru, tau aiavo Rome gabemanina i vovoagui. Tau ai bada wavalatona Herod Antipas. Mai Jew maġamaġau ma mai Pharisi maiteni, i notai da Herod ana rava tau i vivibenabenam ai rava au oiena awarii.

† **3:7-8:** Eng. Tyre & Sidon. Wei ravana eġa mai Jew. ✧ **3:9-10:** Mrk 4:1

*Iesu ana Apasol 12 i vinei
(Matthew 10:1-4; Luke 6:12-16)*

¹³ Anina ma Iesu i ġae au ola ma ana ġoanei nanare, rava i kwatuei da awarina i ġei. ¹⁴ Tauna, nelara 12 i vinei da maiteni ita mae ma muriai ita paritawanei da ita raugugula. Ma i ġorei *Apasol*.
¹⁵ Ma i vovai-virewapani da arua-apoapoei rava au orai ina viopuni.

¹⁶ Taui i vinevinei 12 ai wava wenanare,
Simon i ġoreġoreia Peter‡

¹⁷ ma Zebedi§ natuna James ma ana tevera John i ġorei Boaneges, anona waiparara natu-
natuna,

¹⁸ Andrew,
Philip,

Batolomeo,*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

¹⁹ ma Judas Iskariotei; * tauna, Iesu tauviben-
abenameina.

*Rava i riwa da arua-apoapoei Iesu e vivibadei.
(Matthew 12:22-32; Luke 11:14-23; 12:10)*

‡ **3:16:** Anona Ġaima. § **3:17:** Eng. Zebedi. * **3:18:** Eng. Batolomeo. † **3:18:** Eng. Alphaeus. ‡ **3:18:** Wavana ġelauna Judas - Luk 6:16 § **3:18:** Anona lamna tau i mai Jew ma tau i Rome e viviġaviei. * **3:19:** Iskariot, lamna Judas ana melagai wavana da auna lamna Iskariotei.

20 Ma Iesu ana tauvotaḡotaḡo maiteni i rui au numa. Ma patara i rieiai da tau i eḡa tagotagogina da ita am. 21 Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

22 Tarawatu babadai ḡelau i Jerusalem i nei ma i riwa i pa, “Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni.”

23 Lamna aubaina Iesu, wei Babadai i ḡorei ma awanainei i pa, “Satan amapo Satan eḡa ina viopuni. 24 Mepa da dobu ravai ina viḡavia vivira, lamna dobuna ita mae ava. 25 Ma nanare dam ina viḡavia vivira, nai damna ita mae ava. 26 Ma Satan ita vomairi ma ita viḡaviana-melei, amapo ita mae ava. 27 Taudanene amapo eḡa rava virewapanana ana au numa ina danene, eḡa da au naona ravana ḡuravei ina raḡini ma muriai ina danene. 28 Riwa kaua a ririwemi da God ami ḡo’apoapoei ma ami vijiboḡa anatapui ina nota-tawanei. 29 Wate aiai da Arua Vivivireina e vivijiboḡi, God, nai ravana ana ḡo’apoapoei eḡa melanai ina nota-tawanei ma ana ḡo’apoapoei ina mae-nonoa.” 30 Iesu wenanare i babani, aubaina rava ḡelau e ririwa, “Iesu au orana arua-apoapoei e mamae.”‡

Iesu ana dam oina
(*Matthew 12:46-50; Luke 8:19-21*)

† 3:22: Eng. Beelzebub. Anona lamna, nabugara ai bada.

‡ 3:30: Tarawatu tau girumi i parivaijijigei aubaina tau i ririwa da Arua Vivivireina ana nola lamna baravu da parauma. BADA eḡa melanai ai ḡo’apoapoei ina nota-tawanei.

³¹ Iesu alona ma varevareina i nei ma au doa i maimairi ma riwa i paritawanei Iesu awarina da ita nei. ³² Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e g̃oẽg̃oem.”

³³ Iesu i paribelei i pa, “Aiai alou ma aiavoi varevareiu?” ³⁴ Anina ma tau i kiakiala i 'nanai ma i riwa i pa, “Ona inana! Wei tau alou ma varevareiu. ³⁵ Aiai God ana g̃oana e kaukauei, tauna alou ma novu ma vareiu.”

4

Doa tapuna ma tapuna ai awanaina (Matthew 13:1-9; Luke 8:4-8)

¹ Iesu, giu i raukarena-melei Galili topana au adana. Ma patara i riei da ita rautaniḡanei. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

² Ma kua maḡamaḡau awanainei i giu ma i viararamana i pa, ³ “Ona rautaniḡana! Taupaewa, ana wapu i vokaukauei ma pei i ravi awawari. ⁴ Pei ḡelau au eta i peu. Ma kiu i ḡeta ma i ani. ⁵ Ma pei ḡelau doa au ḡaiḡaimana i peu, doa au avavana. Ma lamna aubaina maratagogi i gogo. ⁶ Wate maranai madeḡa i rarani, maratagogi i poi, anona warami eḡa ita ḡaira guratana doa au orana. ⁷ Pei ḡelau, modu donadonai au poui i peu. Ma modu donadonai i gogo ma pei i gogogo i lavani, ma eḡa ita ua. ⁸ Ma pei ḡelau doa au aiaina i peu ma i gogo kua ma i ua, ḡelau 30, ḡelau 60 ma ḡelau 100.”

⁹ Ma Iesu i riwa i pa, “Mepa da taniḡami e mamae, riwa ona nonori!”

*Aiwai aubaina Iesu awanainei i babani
(Matthew 13:10-17; Luke 8:9-10)*

¹⁰ Maranai Iesu ainelana i mamae ma ana tau-votaḡotaḡo ¹² ma taurautaniḡana ḡelau i ḡeta ma Iesu i vibaḡai da awanaina anona ita riwei.

¹¹ Ma Iesu i paribelei i pa, “God ana vigulau ana kua mamae govaḡana; taumi i vieḡemi ma rava au tano maemaei, tau aiwai anatapui awanainei e paripari-verei. ¹² Lamna ana kau ei da wariāḡa peroveta aiwai i girugirumia ina tupua:

‘Tau i ina inana ma eḡa ita inainanai.

Tau i e rarautaniḡana ma eḡa ita araramanei;
ma lamna aubaina tau i eḡa ita nenei God awarina

da ai ḡo’apoapoe ita notatawanei.” *(Isaiah 6:9-10)*

*Doa tapuna ma tapuna anoi.
(Matthew 13:18-23; Luke 8:11-15)*

¹³ Anina ma Iesu i riwei i pa, “Wei awanainei a babani ma anona eḡa ota aramanei bo? Ma awanaina ḡelau menanare ona aramananei?

¹⁴ Taupaewa, God riwana, rava anatapui e paripari-verei. ¹⁵ Rava ḡelau orai i bagibagi me etanai. Riwa au tepana e rauraei, wate maratagogi Satan e nenei da riwa rava au orai e vaivai-tawanei. ¹⁶ Ma rava ḡelau orai me doa viḡaiḡaimana. Tau i, riwa i nonori ma maratagogi ana nuaiiai riwa e vaivaia. ¹⁷ Wate warami eḡa da eḡa ita mamae guratana. Ma maranai nuabola bo rau-iviapoapoe e nenei tau i awari, aubaina tau i ai tumaḡana God awarina e tereterei. Tau i maratagogi e peupeu. ¹⁸ Rava ḡelau orai me pei, modu donadonai au orai e gogogolana. Tau i anina

riwa e nononori. ¹⁹ Wate lawana ai nuabola ma mane ai nuavainana ma kua gēlauri ai au nuaiari e ruirui ma God riwana e lavalavani da ega ita uaua. ²⁰ Ma gēlauri, tau me pei doa au aiaina i peu. Tau, lamna anina riwa e nononori ma e vaivai-kauei ma e uaua: gēlauri 30 ma gēlauri 60 ma gēlauri 100.”

²¹ Iesu i riwai i pa, “Rava, ega rampa ita neineiari da iriga au gabaurina ita tereterei bo vatara au gabaurina ta pa? Rampa ana au anikiala e tereterei ta pa? ²² Kua mamae govagai, anataputapui a viegai ma kua govagovagai nanarena ana viegai. ²³ Mepa da tanigami e mamae, riwa ona nonori!”

²⁴ Iesu i riwai i pa, “Aiwai o nononoria ona rautaniganana-kauei, ruva o ruveruveia, God nanare awarimi ina ruvai ma gēlauna ina tavipotoi. ²⁵ Lamna aubaina, mepa da riwau ona aramanei, tau gēlauna ma gēlauna ana veremi. Ma tau ega ita aramanei, lamna aiwai aburuna i nononoria, ina vine-boai.”

Pei gogogona ana awanaina.

²⁶ Iesu e ririwai i pa, “God ana vigulau me rava, witi peina au doa ita ravi-awawari. ²⁷ Ma waguvara e matamatave ma maratome e vovomairi ma pei e gogogo ma e rarata. Wate aiwaiei e gogogo, tauna e vivinuaninei. ²⁸ Doa ana nuaina, pei me witi e vivigogoi ma e uaua. Au naona e raraupairei ma muriai e roverove ma muriai anona e magumagura au tapina. ²⁹ Maranai i magura, rava petona e raraukarei. Tuaruta marana i getai.”

Pei aburuoia ana awanaina (Matthew 13:31-32, 34; Luke 13:18-19)

³⁰ Iesu i riwa i pa, “God ana vigulau aiwaiei ana parivai-patepatei bo aiwai awanainei ana pariveremi?” ³¹ Wenanare, wei aina peina, lamna me gaga peina, pei aburuoina au dobu ma au doa i paewi. ³² Ma peina i gogo ma i rata da ai muomuoi i ġetawanei ma raġaraġai ġaeġae i terei ma au ġoui, kiu ai noġi ita voai.”

³³ Ma Iesu, awanaina maġamaġai, rava au matai i raugugulei da tau i ai rau-taniġana ana au ruva nanare. ³⁴ Awanainei, rava awari i ġiugiu, wate ana tauvotaġotaġo ava awari kaua anatapui i vivieġai.

*Iesu, kojikojira i ravi-daumorai
(Matthew 8:23-27; Luke 8:22-25)*

³⁵ Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.” ³⁶ Anina ma tau i patara i voterei. Ma anatapui Iesu, maiteni au waga i geru ma i damana, waga ġelau i maiteni. ³⁷⁻³⁸ Iesu, waga au murina unutana i terei ma i raunuavuru. Ma kojikojira ġaeġaena i tupua ma rabama, waga au tepana i rauraei ma waira, waga i oaoai. Ma ana tauvotaġotaġo, tauna i ravi-dagudagui ma i riwei i pa, “Taugiu, nuanuam e bolabolai bo eġa da tana iraġe?”

³⁹ Ma tauna i vomairi ma ive i viġaei ma i riwei i pa, “Ma genuana!” Ma rabama i riwei i pa, “Ma mae-genuatau!” Ma ive i wanatuini ma daumora ġaeġaena i matave. ⁴⁰ Iesu ana tauvotaġotaġo i riwei i pa, “Ai-wai aubaina o rovorovo? Taumi amapo da eġa ota vitumaġana!”

41 Ma tau i rovo kua ma i riwa vivira i pa, “Wei aiai ravana da ive ma rabama tauna e vovoteletelei?”

5

Iesu, arua-apoapoena oroto awarina i viaḡaḡana-opunei.

(Matthew 8:28-34; Luke 8:26-39)

1 Iesu ana tauvotaḡotaḡo maiteni Galili topana au baba ḡelauna i ḡeta, mai Gerasa ai au dobu. 2 Wei au dobuna, arua-apoapoena oroto au orana maemaena. 3-5 Eḡa aiai tagotagogina da ita vovaiubai. Mara maḡamaḡauna, aena ma urana seinei i pani. Wate wei i viaituituini, ma eḡa tagotagogina da seinei ita pani. Marai ma waguvarai i nene-labalababa ma i garagarara ma ḡaimei tupuana i boribori-melei ma au kokoaga ma au ola i raunuma. 6 Maranai Iesu wagei i opuopu, arua-apoapoei orotona i rui ruinia, aueia Iesu i 'nanai ma kokoagei i ruba ma Iesu au naona i mae-peu ma i raudune. 7-8 Iesu, ravana i riwei i pa, “Arua-apoapoena, wei orotona ma opu-tawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ḡoeḡoei? God wavanei a vivibaḡaim da eḡa ma kovogiu!” 9 Iesu, orotona i vitara-virevirei i pa, “Tam wavam aiai?”

I paribelei i pa, “Tauai a maḡa, aubaina tau wavau lamna Ḡavia Patarana.”

10 Ma arua-apoapoei, Iesu i vibaḡa-guratei da avena nai dobunei ita viopuna-tawanei.

11 Ma poro boruna ḡaeḡaena au ḡereḡere ola au adana i labalaba. 12 Ma arua-apoapoei, Iesu

i vibaḡai, “Ma paritawanelai poro au orai ana rui.”
 13 Iesu i vianina. Ma arua-apoapoei, orotona i opu-
 tawanei ma poro au orai i rui. Poro boruna 2,000
 nanare olei i ruba ḡaira da au topa i monu.

14 Ma poro taupainii i ruba nae au melagai ma
 au wapu; ma riwa i vibabarai. Ma rava i nei
 da ita inanai aiwai i tupua. 15 Ma maranai i nae
 Iesu awarina, orotona au naona arua-apoapoei
 patarai au orana i mamae; tauna i kiakiala, gara
 i oteni ma ana nota jijimanina. Ma tau i rovo kaua.
 16 Ma aiwai i tupua orotona ma poro awari, tau i
 ’nainanaia, rava i riwana-naiei.

17 Ma dobuna ravai, Iesu i vibaḡai da dobuna
 ita oputawaneii.

18 Iesu au waga i gerugeru ma orotona, Iesu
 i vibaḡai i pa, “Tau maiteni tana nae.”

19 Iesu i viḡaei ma i riwei i pa, “Ma naeme am au
 dam. Ma BADA kaua aiwai ḡaeḡaena i kaukaueia ma
 ana iviaiai tam awarim, tau ma parivereii.”

20 Ma anina orotona, Iesu i netawanei ma i nae
 au Dekapolis (*melagai 10*) da Iesu aiwai awarina
 i kaukaueia, rava i riwana-naiei. Ma tau anatapui
 i nononoria i baiei.

*Iesu, Jairus natuna wavinena ma wavine dori-
 doriana i vilawani.*

(Matthew 9:18-26; Luke 8:40-56)

21 Iesu wagei i damana me topa au baba ḡelauna.
 Maranai kampa i ḡeta ma topa au adana, ma
 patara i rieiai. 22 Pari numana badana wavana
Jairus i nei weka ma maranai Iesu i ’nanai, tauna
 Iesu au aena i mae-peu 23 ma i vibaḡa-guratei i pa,

“Natu guguinina e irairaḡe. Ma nei ma uram au inina ma terei ma ina lawana.”

²⁴ Anina ma Jairus, Iesu maiteni i nae ma patarana i mae gariḡuruvi ma i votaḡotaḡoi.

²⁵ Wavine tagogi kampa patarana au orana awarina tara-doriana i mae da madeḡa 12 i kwa. ²⁶ Ana mane anataputapuna, dokedoketa maḡamaḡau awarii i tawanei ma eḡa tagotagogina ita vilawani ma amapo da ana doria i rarata. ²⁷⁻²⁸ Tauna, Iesu nolana ma ana babani i nonori ma au orana i vinua-notanota i pa, “Mepa da ana gara ava ana vodadani ma ana lawana.” Ma tauna, Iesu murinei i nei ma ana gara i vodadani. ²⁹ Maratagogi, tara-doriana i wanatuini ma malana i vaia da i lawana. ³⁰ Nai maranaina, Iesu malana i vaia da ana rewapana i opu-tawanei ma i mae-tavirei patara au poui ma i riwa i pa, “Aiai au gara i vodadani?”

³¹ Ana tauvotaḡotaḡo, tauna i riwei, “Ma inanai, patara i mae gariḡuruvim! Ma menanare da u riwa ‘Aiai i vodadani?’”

³² Wate Iesu i 'nana viravira da ita inanai aiai i vodadani. ³³ Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieḡei.

³⁴ Anina ma Iesu, wavine i riwei i pa, “Natu, am tu-maḡana i vilawanim. Am doria i kwa, ana nuaubam ma nae!”

³⁵ Maranai i bababani ma rava ḡelau i Jairus ana numei i nei ma i riwei i pa, “Natum ana mara i kwa. Eḡa Taugiu ma visina-viravirai.”

³⁶ Iesu ai babani i nonora-tawanei ma Jairus i riwei i pa, “Eḡa ma rovo, ma vitumaḡana!” ³⁷ Iesu, rava ḡelau i viḡaei ma Peter ma James ma ana tevera

John maiteni i nae. ³⁸ Ma Jairus ana au numa i ġeta ma Iesu, patara i 'nanai; i toutou ma i taratarakwatu ³⁹ ma i rui ma tau i riwei i pa, “Aiwai aubaina o taratara-kwatu ma o toutou? Tevera eġa ita iragē, tauna e matamatave ota.”

⁴⁰ Ma tau i, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġotaġo tonuġa maiteni i rui mepa tevera i matamatave lana. ⁴¹ Iesu, tevera nimana i vaia ma i riwei i pa, “*Talitha koum!*” wei anona, “Kukuma, ma vomairi!”

⁴² Maratagogi i vomairi ma babara i vikarei (Tauna ana madeġa 12). Ma tau i ba kaua. ⁴³ Iesu, tau i riwana-guratei da eġa aia i ita vieġei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotaġotaġo maiteni nai dobuna i netawanei ma i naeme ana au melagai. ² Ma Sabat marana i ġeta ma tauna giu i vikarei au pari numana. Ma rava maġamaġau i riei da i rautaniġanei. Tau i anatapui i baiei ma i vitara-viravira vivira i pa, “Wei tauna nuaulaula ma aramanana mepa i vaia?” Ma, “Kaua aiwaiei e kaukauei?” ³ Anina ma tau i ava i babani vivira i pa, “Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?” Ma lamna aubaina mai Nasaret, Iesu i parivirevirei.

4 Iesu, tau i riwei i pa, “*Peroveta* dobu au gēlaui e vivivirei, wate ana au melagai, ana rava ma ana dam oina, eḡa ita vivivirei.”

5-6 Tauna i baiei da rava eḡa tauna ita vitumaḡanei. Ma eḡa tagotagogina da kua vivirewapanai kampa ita kauēi. Tauna urana, rava ruaḡa ota doridoriai au tepai i terei ma i vilawani. Ma muriai, melagai nununai au ḡereḡerei i viararamana nae.

Iesu ana Apasol i paritawanei da ita viararamana

7 Ma Iesu, tau i 12 i ḡoreiai ma ruaruāḡei ava i paritawanana-opunei ma rewapana i verei da arua-apoapoei ina viaḡaḡana-opunei. 8 Ma riwa bag-ibaginei i riwei i pa, “Ami au vaḡai, eḡa aiwai ona vaia anina jḡona ava; eḡa lam, eḡa autu bo mane au urami. 9 Ae uma ona oteni ma eḡa kwama ḡelauna ona vaia.” 10 Ma i riwei i pa, “Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei. 11 ✨Mepa da au melagai o ḡeta ma rava eḡa ita vianinemi bo eḡa ita rautaniḡanemi. Nai melagaina ona oputawanei ma aemi pokauna ona rauabuabui da ina aramanei da tau i ai wavu!”*

12 Ma tau i opu ma rava awari i raugugula ma i riwei i pa, “Taumi ami ḡo’apoapoei ona voterei ma

✨ **6:11:** Act 13:51 * **6:11:** Wariāḡa mai Jew, tauvaḡai e nenememei au Israel. Tau i aei pokau e rarauabuabui maranai Israel ana au parata e ḡeḡeta, lamna tau i orai e viaiaini. Ma Iesu ana tauvotaḡotaḡo wei i kauēi da melagai ravai ina notai, “Tauvotaḡotaḡo e ririwa da tauta orata apoapoea me tauta eḡa mai Jew.”

ona mae-taviremi God awarina!” ¹³ Tauī, arua-apoapoei i viaḡaḡana-opunei. Ma rava doridoriai maḡamaḡauī, olive oirana au kolai i buloi ma i vilawani.

John Taubabataito ana iraḡe

¹⁴⁻¹⁶ ✨ Iesu nolana i nae da rava anatapui i aramanei ma tauna i babaniei. Ma rava ḡelau i ririwa i pa, “Tauna, kua vivirewapanai e kaukauei, aubaina tauna John Taubabataito iraḡelei i vomairi me.” Ḡelau i ririwa i pa, “Tauna Elijah i nememei.” Ma ḡelau i ririwa i pa, “Tauna peroveta wariḡai nanare.” Ma gulau Herod,[†] nolana i nonori ma i riwa i pa, “Tau, John Taubabataito uana a borituini; marina i vomairi me.” ¹⁷⁻²⁰ John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaḡi. Wavinena wavana Herodias. Au murina John, Herod i riwana ḡiriḡiriei i pa, “Tarawatu e mamae da eḡa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniḡanei. Wate nuanuana i raḡaraḡa.

Ma Herodias, John awarina amlona i ḡaiḡai ma virāḡenana i ḡoei. Herod i aramanei da John, lamna rava jijimanina ma vivivireina ma i ḡalaoei. Herod, John i rovoei ma lamna aubaina wavinena eḡa tagotagogina da aiwai ita kauei.

✨ **6:14-16:** Mrk 8:28 † **6:14-16:** Herod Antipas, Galili ana Wavalatona.

21 Ma wavine, gavogavo i'nanai, maranai Herod ana tupua marana iġeta ma torela i vokaukauei. Ma gabemani babadai ġaeġaei ma sorodia ai babada ġaeġaei ma Galili babadai i raukwatuei. 22 Ma Herodias natuna wavinena i nei ma i ara. Herod ma tau i maiteni i amam i vinuaiaini. Ma gulau, guguini i riwei i pa, "Aiwai u ġoeġoeia ma vibaġaiu ma ana verem!" 23 Ma i parivainuaġani i pa, "God au matana a ririwem da aiwai u vivibaġeiu ana verem da au vigulau navanavana au paratana."

24 Ma tevera wavinena i opu ma alona i paridadanei i pa, "Aiwai ana vibaġei?"

Ma i paribelei i pa, "John Taubabataito kolana."

25 Ma maratagogi i vipaparana ma gulau awarina i rui ma i vibaġai i pa, "A ġoeġoei da marina John Taubabataito kolana ma vereu au aboma!" 26 Ma gulau nuanuana i bola-kauei. Wate parivainuaġana boiboġi i kauei tau i amam au matai. Ma lamna aubaina guguini, aiwai i vivibaġei anina i vianinei. 27 Ma tauviraġena i paritawanei ma i riwei da John kolana ita neiai. Ma i nae panipani au numana ma John uana i borituini. 28 Ma kolana au aboma i terei ma guguini i verei ma guguini, alona i verei. 29 Ma John ana tauvotaġotaġo, nolana i nonori ma i nei ma taubeuna i vaia ma au kokoaga i vimataveni.

Iesu, nelara 5,000 i viambagibagi

(Matthew 14:13-21; Luke 9:10-17; John 6:1-14)

30 Apasol i ġeta memei ma aiwai anataputapuna i kaukauei ma i raraugugulei, Iesu i vieġei. 31 Lamna maranai, rava maġamaġai i nenei ma i nena da Iesu ana tauvotaġotaġo maiteni eġa gavogavo

ita maemae da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.” ³² Ma anatapui wagei i nae au mutulua.

³³ Wate rava maḡamaḡau i ’nanai i nenaē ma i aramane i tau i aiavo i. Ma melagai nununai anatapui gerae i ruba gogona da au dobuna i aiḡeta. ³⁴ Maranai Iesu wagei i tuopu au gera ma patara ḡaeḡaena i ’nanai ma nuanuana i bola-kauē. Tau i me sipu ma eḡa ai tauvipaipai. Ma Riwana Aiaina viararamanai i raukarei. ³⁵ Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere. ³⁶ Rava ma paritawane i da ina nae au melagai ma au wapu au ḡereḡere da ai lam ina gimarai.”

³⁷ Wate Iesu i paribelei i pa, “Taumi ona viambagibagi!” Ma tau i paribelei i pa, “Mepa 200 *denarii*‡ tana vaia da wei patarana tana viambagibagi?” ³⁸ Ma Iesu i paridadane i pa, “Palawa biaḡa awarimi? Ona nae ma ona baiei!”

Maranai i nelaḡai ma i riwa i pa, “Awariai, palawa five ma iana ruaḡa.”

³⁹ Anina ma Iesu, patara i riwei i pa, “Boru nununai, gidagida au majimajiḡai ona kiala nae.” ⁴⁰ Ma tau i ai au boru 50 da 100 nanare i kiala nae. ⁴¹ Ma Iesu, palawa five ma iana ruaḡa i vaia ma i ḡoutata au mara ma God i viegualauē. Ma palawa i vogimagimai ma iana i ḡutai da ana tauvotaḡotaḡo i verei ma tau i, rava i verei. ⁴² Ma patara i am ma

‡ **6:37:** 200 denarii. Denarius tagogi lamna taubagibagi ai maia au pom tagogo nolana aubaina.

i am-iaua. ⁴³Ma ana tauvotaḡotaḡo, lam am tereter-enai i tuarui da poa muomuoi 12 i vioai. ⁴⁴Nelara 5,000 i viambagibagi.

*Iesu, waira au tepana i babara
(Matthew 14:22-33; John 6:15-21)*

⁴⁵Anina ma Iesu, ana tauvotaḡotaḡo i egari da ita aidamana au Bethsaida.§ Tau i au waga i geru da i nena ma tauna, patara i paritawanei. ⁴⁶Patara i paritawanei ma tauna ava i ḡae au ola da ita raupari. ⁴⁷Ma waguvara ana tauvotaḡotaḡo au waga au topa ma Iesu au alala. ⁴⁸Ma ana tauvotaḡotaḡo, lare i vovoguratei da ita ḡota wate ive i viraumatamatani. Ma maratmtom nanare, Iesu i nae awari. Tauna waira au tepana i bababara ma i ḡoei da tau i ita tutelarei. ⁴⁹⁻⁵⁰Ma maranai tau i, Iesu i 'nanai topa au tepana i bababara ma i notai da tauna konaḡa ma i rovo kaukua ma i vigaragararei. Ma maratagogi Iesu i riwa i pa, "Tepami ina tora! Tau, eḡa ona rovo!"

⁵¹Ma au waga i geru ma ive i wanatuini ma tau i bana-kauei. ⁵²Avena da kaua palawa awarina i kauei i 'nanai, wate ana rewapana eḡa ita aramana-kauei. Tau orai i bado ma i vinuanaina.

*Iesu, rava doridoriai maḡamaḡau i au Genesaret
i vilawani
(Matthew 14:34-36)*

⁵³Tau i, topa i damani ma au Genesaret i ḡota ma ai waga i raḡini. ⁵⁴Tau i, waga i oputawanei ma rava, Iesu i 'nanai ma maratagogi i aramanei da tauna. ⁵⁵Iesu nolana, Galili provins anapui i naeni ma

§ 6:45: Eng. Bethsaida.

i nonori da tauna mepa i mamae. Ma kampa, dori-doriai rasirasiei i vivaneiai. ⁵⁶ Iesu mepa i nenelana, melagai gaegeaei ma muomuoi ma wapu mepa rava e mamae lana. Ma rava, ai rava dori-doriai nai au melagaina i neiai au deba. Ma i vibağa, da dori-doriai, Iesu ana gara adana ava ita vodadani. Ma aiavoi Iesu ana gara i vodadani i lawana.

7

Amamami ai giu (Matthew 15:1-9)

¹⁻⁴ Pharisi ma Jew anapui, magumagura ai giu mağamağau e notanota-jijini. Tau, ai aniuma ma ai aniam anapui e oğaoğai lamnei tau e viaiaina-melei God au matana. Ma maranai au maket da e nenei, urai ina oğai ma ina am. Tau eğa ina am da au naona urai ina oğa kau e me ai magumagura ai giu nanare.

Maratagogi Pharisi gelau ma Tarawatu Babadai, Jerusalem ei i nei Iesu awarina da ita rautaniğanei. Ma tau i 'nanai da Iesu ana tauvotağotağo gelau, urai eğa ita oğai ma i amam.

⁵ Ma tau, Iesu i vitara-virevirei i pa, "Aiwai aubaina am Tauvotağotağo magumagura ai giu, eğa ita votağotağoi ma ana ura miramirai e amam?"

⁶ Ma Iesu i paribelei i pa, "Taumi morumorumi ma o vikaua-aiaina-melemi. God ana peroveta Isaiah i riwa kua maranai i riwa, i pa:

'Wei ravai ipiriei e vovoepaepai,
wate nuanuai aueia.

⁷ Tau rava ai giu e viviararamani.

Lamna aubaina ai voepaepa anona eğa.
(Isaiah 29:13)

⁸ Taumi, God ana Tarawatu o teretere-tawanei ma ami giu o votaḡotaḡoi.”

⁹ Ma i riwana-melei i pa, “Taumi o aramana kua da God ana Tarawatu o gedugeduaiei ma amamami ai giu o vovotaḡotaḡoi. ¹⁰ ✧God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona viragēni.* ¹¹ Wate taumi o viararamana da aiai awarina mane bo purapura, amana bo alona ita voagui ma ita riwei, ‘Awariu e mamae da ata voaguim; wate lamna *Corban* - a tereriei pulo, God aubaina.’ ¹² Wei viararamanana, tau e viviḡaei da amana ma alona ina voagui. ¹³ Ma wei taunei viararamana, rava awari o vividamani; ma God riwana o vivikwakwavi. Ma kua maḡamaḡau ḡelau maiteni o kaukauei.”

Metauna kauai, rava orai e vivimirai.
(*Matthew 15:10-20*)

¹⁴ Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei. ¹⁵⁻¹⁶ Aiwai au tanoei au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”*

¹⁷ Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai. ¹⁸⁻¹⁹ Iesu i paribelei i pa, “Taumi maiteni eḡa ota aramanei bo? Kua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au

✧ **7:10:** Exo 20:12; Exo 21:17 * **7:15-16:** Giruma ḡelau Mark uranei i girugirumia wei riwai wenanare e mamae, “Mepa da taniḡami e mamae, ona rautaniḡana.”

nuapouna, wate au manawana da e opuopu.” (Wei riwanei Iesu, lam anatapui i viaiaini).

²⁰ Anina ma i riwa i pa, “Aiwai, rava oranei e opuopu; lamna, rava e vivimirai God au matana.

²¹ Anina rava nuanuanei vinuanotanota apoapoei e opuopu me: viawawana labalababa, danene, viragēna, awadanene, ²² ambo, rau-iviapoapoe, moru, erawa, unura, terevaidegā, mae-gāe-gāe ma opa. ²³ Wei kauai apoapoei anatapui oranei e opuopu ma rava e vimiramirai.”

*Jentail wavine,† Iesu i vitumaḡanei
(Matthew 15:21-28)*

²⁴ Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa. ²⁵⁻²⁶ Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoena ita viopuni.

²⁷ Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”‡

²⁸ Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam mo-moḡina, kepaKepa au gabaurina e rauraua e aniani.”

† **7:23:** Rava eḡa mai Jew. ‡ **7:27:** Riwa roaroa wei au awanaina lamna mai Jew. Taui e notanotai da taui i ai guratana eḡa me rava ḡelau. Lamna aubaina taui dobu ḡelau ravai e ḡoreḡorei auou.

29 Ma Iesu wei i riwei i pa, “U paribelana kaua, aubaina ma nae au numa. Arua-apoapoena natum i opu-tawanei.”

30 Ma wavine i naeme au numa. Natuna wavinena i ’nanai i matamatave, arua-apoapoena boibogi tevera i opu-tawanei.

Iesu, oroto taniġa-potapotana ma mena birebirena i vilawani

31 Iesu Taia ma Sidon ana parata i netawanei ma au babaġela Dekapolis i verautuini ma i nae au Galili topana. 32 Orotu taniġana potapotana ma menana birebirena i neiai Iesu awarina ma i vibaġai da urana au inina ita terei da ita vilawani. 33 Iesu, oroto i taravaina-opunei da tau i ava ma ura-gigina, oroto au taniġana i terei ma ura-gigina ġelauna i ovai ma menana i vodadani. 34 Nuanuana i bolai ma i ġoutata au mara; i lavutu tawanana ma oroto i riwei i pa, “*Ephatha!*” Wei anona, “Ma wanatawanei!” 35 Maratagogi taniġana i wanatawanei ma menana i vidagudagu ma i babani kaua. 36 Ma Iesu, tau i viġaei da aiwai i tuputupua, avena rava ita vieġei. Iesu, rava i viġaei; wate tau i eġa ita rautaniġana ma riwa i vituai. 37 Ma maranai ravai wei i nonori, tau i bana-kauei ma i riwa i pa, “Aiwai anapui i kauana-kauei. Tauna, rava taniġa potapotai e vivilawani da e rarautaniġana ma menabirebirei e bababani.”

8

*Iesu, rava 4,000 i viambagibagi
(Matthew 15:32-39)*

1 Nai maranai, patara ġaeġaena i riana-melei. Patara eġa ai lam. Ma Iesu, ana tauvotaġotaġo

i kwatuei da i nei ma i riwei i pa, ² “Au pom tonuġa patara maiteni a mae ma ai lam eġa ma a rau-naupoapelei. ³ Tau i ġelau, uamei i nei. Mepa da ana am-iraġe ana paritawanei ai au numa, ma au etanai ina raumolaġau.”

⁴ Ma ana tauvotaġotaġo i paribelei i pa, “Wei mutulua ma mepa lam tana vaia da wei patarana tana viambagibagi?”

⁵ Ma Iesu, tau i paridadanei i pa, “Awarimi palawa biaġa?”

Tau i riwa i pa, “seven.”

⁶ Ma Iesu, patara i riwei da au doa i kiala. Ma palawa seven i vaia ma God i viegualuei ma i vogimagimai ma ana tauvotaġotaġo i verei da patara i verei. ⁷ Ma tau i awari, iana muomuoi ruaġa ota. Iesu i vaia; God i viegualuei ma ana tauvotaġotaġo i verei da patara i verei. ⁸ Tau i anatapui i am da i am-iaua. Ma lam am tereterenai i tuarui da poa ġaeġaei seven i vioai. ⁹ Rava 4,000 i viambagibagi. Ma muriai i paritawanei ai au numa.

*Pharisi, God ana mataira i vibaġei
(Matthew 15:39-16:4)*

¹⁰ Maratagogi, Iesu ana tauvotaġotaġo maiteni au waga i geru ma i nae Damanuta ana au parata.

¹¹ Pharisi i ġelau i nei ma viparipariġai i vikarei Iesu maiteni. Tau i ġoei da Iesu ita raudadani da mataira Godei ita viatataiei. ¹² Iesu, Aruane i lavutu tawanana ma i riwa i pa, “Wei kimta voui, ai-wai aubaina mataira e ġoeġoei? A ririwana-kauemi, amapo mataira eġa ona inanai.”

Iesu, ana tauvotaġotaġo I parivainotai

13 Anina ma Iesu, patara i netawanei ma ana tau-votaḡotaḡo maiteni au waga i geru me ma i damana Topa Galili au baba ḡelauna. 14 Ma ana tau-votaḡotaḡo, nuauai i vuru da ai palawa ita vaia ma palawa tagogi ava au waga i mamae. 15 Iesu, tau i parivainotai i pa, “Pharisi ma Herod ai giu ma ai viararamana morumoruna ona inana-kauei! Lamna me yist.*”

16 Ma tau i babani vivira i pa, “Tauta eḡa ata palawa aubaina da e ririweta.”

17 Ma Iesu i aramanei ma tau i riwei, “Aiwai aubaina o bababani da taumi awarimi eḡa palawa? Taumi amapo da eḡa ota aramana ma o vivinuanaina? Orami i bado bo? 18 ☆Matami e mamae ma eḡa ota inainana. Ma taniḡami e mamae ma eḡa ota nonora. Ma o vinuanotanota bo eḡa? 19 Maranai palawa five a vogimagimai rava 5,000 aubaii, lam am tereterenai o tami da poa biaḡa o vioai?”

Tau i paribelei, “Twelve.”

20 “Ma maranai palawa seven a vogimagimai rava 4,000 aubaii, lam am tereterenai o tami da poa ḡaeḡaei biaḡa o vioai?”

Tau i paribelei, “Seven.” 21 Ma tau i riwei i pa, “Ma amapo da o vivinuanaina!”

Iesu, oroto mata apoapoena i vilawani au Bethsaida

22 Tau i nei au Bethsaida ma rava ḡelau, oroto matana apoapoena i neiai Iesu awarina ma

* **8:15:** Yist mai Jew awarii awanainei lamna aiwai da apoapoe, mira bova e vivitua bo e vivimaḡai. Weka Iesu mai Pharisee ma mai Herod ai lawana ma ai giu morumoru e babaniei, da eḡa ina tua.

☆ **8:18:** Mrk 4:12

i vibaġa-guratei da ita vodadani. ²³ Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eġa?”

²⁴ Ma i taepai ma i riwa, “Rava a inainanai ma tau me ai ita bababara.”

²⁵ Iesu, urana i tere-melei oroto au matana. Ma matana i wanatawanei da aiwai anapapuna i 'nana-kauei. ²⁶ Iesu, tauna i paritawanei ana au numa ma i riwei, “Eġa ma nae au melagai! Wate jijimanina ma nae au numa.”

*Peter i riwa da Iesu, tauna Keriso
(Matthew 16:13-16; Luke 9:18-20)*

²⁷ Iesu, ana tauvotaġotaġo maiteni i nae melagii Caesarea Philipai au ġereġerei. Maranai i nena ma Iesu, tau i paridadanei, “Rava e ririwa; tau aiai?”

²⁸ ✧ Ma tau i paribelei, “Ġelau e ririwa da tam, John Taubabataito. Ma ġelau Elijah. Ma ġelau e ririwa da peroveta wariaġana tagogi.”

²⁹ Ma Iesu, tau i paridadanei, “Wate taumi, mena o notanota-nei? O ririwa da tau aiai?”

Peter i paribelei, “Tam God ana *Messiah* - anona Keriso.”

³⁰ Iesu, tau i viġaei da eġa aiai ina riwei da tauna aiai.

*Iesu ana iraqe ma ana vomairi me i babaniei
(Matthew 16:21-23; Luke 9:21)*

³¹ Ma Iesu i raukarei da ana tauvotaġotaġo i giuni i pa, “Rava Natuna ina vinuapoapoe kaua. Ma dogadogara, piri si babadai ma tarawatu babadai, tauna ina pari-geduaiei ma ina viraġeni. Ma au pom

tonuḡa au murina ina vomairi me.” ³² Iesu jji-maninei wei kauai i bababaniei ma lamna aubaina Peter, tauna i taravaini au ririva ma enana i vikarei. ³³ Wate Iesu i mae-tavirei ma ana tauvotaḡotaḡo i 'nanai. Ma Peter i eni, i pa, “Satan ma nae au muriu! Tam am nota eḡa Godei ita nenei, eḡa da ravei.”

*Iesu votaḡotaḡona anona
(Matthew 16:24-28; Luke 9:23-27)*

³⁴ Ma Iesu, patara ma ana tauvotaḡotaḡo i raukwatuei ma i riwei, “Mepa da aiai ita votaḡotaḡoiu. Tauna ina bovia-na-melei ma ana korosi ina avarai ma ina votaḡotaḡoiu.† ³⁵ Aiai ana lawana e tatajijini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelai. ³⁶ Ana aii bo anona aiwai, mepa da wei dobuna lawanana ma vigulauna ma vaipai ma am lawana maemaenonoana ma vine-boai. ³⁷ Wate aiwaiei am lawana ma gimara-melei. ³⁸ Mepa da aiai: tau ma au viararamana ina vinimalei; ma i mae-puputeu; ma ana ḡoanei kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vivivirei maiteni.”

9

¹ Ma Iesu, wenanare i riwei, “Taumi a ririwana-kauemi; rava ḡelaumi weka o maimairi amapo eḡa

† **8:34:** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelaḡai aubaina tau, tauna i votaḡotaḡoi. Tauna eḡa ita ririwa da ana tauvotaḡotaḡo au korosi ina iraḡe me tauna.

ona iraḡe da God ana vigulau ona inanai ana rewapanana ina nei.”

*Iesu inanana i virai
(Matthew 17:1-13; Luke 9:28-36)*

² Au pom six muriai, Iesu, Peter, James ma John i taravaini. Ma tau i ava i ḡae ola ḡaeḡaena au tepana. Ma kampa tau i matai, Iesu inanana i virai. ³ Ana gara i arapaira ma gamrina i vimata-kamokamota; eḡa me aiwai ḡelauna au dobu nanare. ⁴ Ma kampa au matai, Elijah ma Moses i eḡa. Ma Iesu maiteni i bababani. ⁵ Ma Peter Iesu i riwei, “Tauviararamana, i aii da tauta weka. Ma vianinelai da numakweta tonuḡa ana voai: tagogi tam aubaim, ḡelauna Moses ma ḡelauna Elijah aubaina!” ⁶ Ma tau i rovo kaua ma Peter eḡa ita aramanei da aiwai i latolaton.

⁷ ☆ Anina ma apau i eḡa ma tau i purui. Ma pona apauei i opu ma i riwa i pa, “Wei Tau Natu au nuavainana, ona rautaniḡanei!” ⁸ Maratagogi tau i 'nana viravira ma eḡa aiwai ḡelauna ita inanai ma Iesu, tauna ava.

⁹ Ma maranai olei i ḡaiḡairai ma Iesu, tau i viḡaei da aiwai i 'nananaia eḡa ina vieḡai da au naona Rava Natuna iraḡelei ina vomairi me.

¹⁰ Ma tau i, wei riwana i voteletelei ma i babani vivira i pa, “Iraḡelei vomairi me anona aiwai?”

¹¹ Ma tau i, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”*

☆ **9:7:** Mrk 1:11 * **9:11:** Mai Jew i vitumaḡana da Elijah au naona ina nememei ma Keriso muriai ita nei. (Mal 3:1, 4:5-6). Ma tau i eḡa ita notai da Elijah rau-iviapoapoe ina nelaḡai ana au nememei.

12 Iesu i paribelei, “Riwa kaua Elijah au naona ina nei da aiwai anatapuna ina vokaukauei. Aubaina wariāga i girumi da Rava Natuna ina vinuapoapoe kaua ma ina inana-geduaiei. 13 Wate a ririwana-kauemi da Elijah anina i nei ma rava, ai ġoanei tauna i rau-iviapoapoelei me i girugirumia nanare.”†

Iesu, arua-apoapoena tevera orotona awarina i viopuni

(Matthew 17:14-21; Luke 9:37-43a)

14 Iesu ana tauvotaġotaġo tonuġa maiteni olei i ġaira memei ai rava awari ma patara ġaeġaena, tau i gariġuruvi. Ma Jew ai tarawatu babadai, tau maiteni i vivitarapiri. 15 Maranai patara, Iesu i ’nanai. Tau ora i auepai ma awarina i ruba ma i vieġualaei. 16 Iesu, tau i vitara-virevirei, “Aiwai o vitarapiriei?”

17 Orototagogi patara au poui i paribelana, “Tauviararamana, arua-apoapoena natu orotona au orana e mamae ma i kauei da eġa ita bababani, lamna aubaina a neiai awarim. 18 Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ġiriġiriei; ma inina e badobado. Am tauvotaġotaġo a vibaġai da arua-apoapoena ita viopuni, wate eġa tagotagogina da ita kauei.”

19 Ma Iesu i paribelei, “Oo mara aiwai ona vitumaġana! Ta mae ġaġa ma ami vita ana ’vara ġaġalei? Tevera awariu ona neiai!”

† 9:13: Iesu lamna John Taubabataito i bababaniei da tauna Elijah (Mat 11:13-14, 17:10-13)

20 Ma tevera i neiai Iesu awarina. Ma maranai arua-apoapoena, Iesu i 'nanai, maratagogi tevera i viaikwajiana-guratei da au doa i tonei ma i vitatauvira ma i vivipuropuro. 21 Iesu, tevera amana i vitara-virevirei, "Wei teverana ana doria mara aiwai i vikarei?"

I paribelei i pa, "Maranai aburunai. 22 Arua-apoapoena mara au anapuna, tauna ai au araratana ma au waira e tawatawanei ma i goei da ita viraḡeni. Mepa da tam tagotagogina; ma raunu'apoapoelelai ma ma voagui!"

23 Iesu, tauna i riwei, "Menanare da u riwa, 'Mepa da tam tagotagogina?' Aiai ravana e vivitumaḡana, God anapuna ina kauei tauna aubaina."

24 Maratagogi tevera amana i garara, "A vitumaḡana, wate au tumaḡana eḡa ita rata ma ma voagui da ina rata!"

25 Iesu i 'nana da patara i rierieiai awarii ma lamna aubaina arua-apoapoena i egari i pa, "Tam arua taniḡa-potapotana ma gumgum. Tau a egaegarim da tevera ma opu-tawanei. Ma eḡa melanai au orana ma rui me!"

26 Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maḡamaḡau kampa i riwa, "Tauna i'raḡe!"

27 Ma Iesu, tauna urana i vojijini ma i sinaepai da i mairi.

28 Muriai Iesu, ana tauvotaḡotaḡo maiteni i rui au numa. Ma maranai taui ava ma i paridadanei i pa, "Aiwai aubaina tauai eḡa tagotagogina da arua-apoapoena ata viopuni?"

29 Iesu, i riwa, "Arua-apoapoei me wenanare, pari ainelana ina viopuni."

*Iesu ana iragē i babaniana-melei
(Matthew 17:22-23; Luke 9:43b-45)*

³⁰ Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ḡoei da rava ita aramanei da tau i mepa. ³¹ Aubaina tauna, ana tauvotaḡotaḡo i viararamani i pa, “Tau i Rava Natuna ina amverenei rava ḡelau i au urai. Ma tau i ina viraḡeni. Wate au pom tonuḡa au murina ina vomairi me.”

³² Wate tau i eḡa ita aramanei tauna aiwai i bababaniei. Ma pari-dadanana i rovoei.

*Tauvotaḡotaḡo i vitarapiri vivira da aiai i ḡetelara
(Matthew 18:1-5; Luke 9:46-48)*

³³ Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitaravirevirei, “Au etanai aiwai o vitarapiriei?”

³⁴ Wate tau i genuana, aubaina au etanai tau i vitarapiri vivira da aiai i ḡetelara. ³⁵ ✨Iesu i kiala ma Apasol 12 i raukwatuei awarina ma i riwei i pa, “Aiai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai.”

³⁶ Ma Iesu, tevera i vaia ma au poui i vimairini. Ma urana au jiḡona i tere-taḡonei. Ma tau i riwei i pa, ³⁷ “Aiai ravana; tau wavauei, tevera wenanare i rauḡorei. Lamna tau maiteni e rarauḡoreiu. Ma aiai da tau e rarauḡoreiu. Lamna tauparitawaneu maiteni e rarauḡorei.”

*Aiai eḡa ata ḡavia, lamna turata
(Luke 9:49-50)*

✨ 9:35: Mrk 10:43-44

³⁸ Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoena i viviopuni ma tauna eġa turata. Lamna aubaina a viġaei da eġa ina kauana-melei.”

³⁹ Iesu i riwa, “Eġa ona viġaei! Eġa aiai au wavau kaua babai ina kauei ma muriai ina parivai-apoapoeniu. ⁴⁰ Aiai ravana eġa ata ġavia; lamna turata. ⁴¹ Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaġotaġo. Tai ai maia eġa ina vine-boai.”

Rauelara babanina

(Matthew 18:6-9; Luke 17:1-2)

⁴² Aiai ravana i kauei da wei teverana ana tumagana Tau awariu i viapoapoeni da ġo’apoapoe i kauei. Lamna i ai da ġaima ġaeġaena ravana au uatabana ina duri ma au boga ina tawanei aubaina God, tauna ina kovoġa-guratei. ⁴³⁻⁴⁴ Mepa da nimam i kauem da ġo’apoapoe u kauei. Ma bori-tawanei! I aii da nimam tagogiava ma lawana mamae-nonoana ma vaia. Ma eġa ma kauei da nimam ruaġa aiaii ma ma nae ai au menamenana; mepa ai eġa melanai ita bobo.‡ ⁴⁵⁻⁴⁶ Mepa da aem i kauem da ġo’apoapoena u kauei. Ma bori-tawanei! I aii da sigesigem au lawana mamae-nonoana ma rui. Eġa me aem ruaġa aiaii ma ai au menamenana ina tawanem.§ ⁴⁷ Ma mepa da matam ina kauem da ġo’apoapoena u kauei. Ma vaitawanei! I aii da matam tagogi ma God ana vigulau ma rui. Eġa me matam ruaġa ma ai

‡ **9:43-44:** Wariaġa nimaiei i giruma damanei tau riwana tagogina me vs 48. § **9:45-46:** Wariaġa nimaiei i giruma damanei tau riwana tagogina me vs 48.

au menamenana ina tawanem; ⁴⁸ dobuna mota-
motana eġa ita irairaġe ma ai eġa ita bobo.

⁴⁹ Au Tauvotaġotaġo anataputapui, ai araratanei
ina bogai.

⁵⁰ “Nia i ai lam viaiainana aubaina. Ma mepa
da i tomatoma, mena ma vidagianei. Nia au orami
ina mae ma ona viturana vivira!”

10

Iesu, tavine vilamonana i babaniei

¹ Ma Iesu, dobuna i netawanei ma i nae Judea
ana paratana. Ma Waira Jordan i damani da au
baba ġelauna. Patara ġaeġaena i riana-melei. Ma
Iesu i viararamana, me mara patapatana i kaukauei
nanare.

² Ma Pharisi ġelau i ġoei da tauna ita waroi.
Ma lamna aubaina i vitara-virevirei, “Tarawatu
e mamae bo eġa da rava, awana maiteni
ita vilamonei?”

³ Ma Iesu i paribelei, “Moses ana Tarawatu aiwai
e ririwei?”

⁴ Ma tau i riwa, “Moses ana Tarawatu e ririwa
da oroto *vilamona pepana ina girumi ma awana
ina verei. Ma tau ina vilamonei.*”

⁵ Iesu i paribelei, “Taumi orami i bada. Au baina
Moses wei Tarawatuna i terei. ⁶ ✧ Wate ona notai
da au karena, maranai God rava i kaui *ma tauna
oroto ma wavine i kaui.* ⁷ ✧ *Ma lamna aubaina
oroto amana ma alona ina netawanei* ⁸ *ma awana
maiteni ina vitagogi* da tau eġa ruaġa me au naona
ma tupua tagogi. ⁹ God aiwai i vitagogiei, eġa ai
ina vilamonei.”

✧ **10:6:** Gen 1:27 ✧ **10:7:** Gen 2:24

10 Maranai tau i naeme au numa, ma tau-votaḡotaḡo, Iesu i vitara-virevirei wei kauai aubaii. 11 Iesu i paribelei, “Mepa da oroto, awana i voterei. Ma wavine ḡelauna i ravaḡi. Lamna tauna, awana awarina i rauiviapoapoe. 12 Ma nanarena mepa da wavine, awana i voterei ma oroto ḡelauna i ravaḡi. Lamna awana, awarina i rauiviapoapoe.”

Iesu, roaroa i viaiaini

13 Rava ḡelau, roaroa i neiai Iesu awarina da urana au tepai ita terei. Ma ana tauvotaḡotaḡo, ravai i viḡaei. 14 Maranai Iesu wei kauai i 'nanai. Ma ana tauvotaḡotaḡo i eni ma i riwa, “Roaroa ona voterei da awariu ina nei. Ma eḡa ona viḡaei. Au baina God ana vigulau, lamna rava wenanare aubai me wei roaroai. 15 A ririwana-kauemi. Aiai, God ana vigulau eḡa ina vaia me tevera aburuna nanare. Tauna, eḡa God ana au vigulau ina rui.” 16 Ma roaroa i taravaini ma i rapai, urana au tepai i terei, i raupari ma i viaiaini.

Purapura ravana

(Matthew 19:16-30; Luke 18:18-30)

17 Ma maranai Iesu i vomairi da i nena. OROTO i ruba ḡeta ma au naona i raudune ma i riwa i pa, “Taugiu vinualaulaunam. Aiwai ana kauai da lawana maemae-nonoana ana vibuderiei?”

18 Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana. 19 ✧Tam, God ana Tarawatu u aramanei, *Eḡa ma viragena! Eḡa ma awadanene! Eḡa ma danene! Eḡa ma viwavu-moru! Eḡa ma amkwalakwala! Amam ma Alom ma vivirei!*”

✧ 10:19: Exo 20:13; Exo 20:14; Exo 20:15; Exo 20:16; Exo 20:12

20 Ma tauna i riwei, “Taugiu! Maranai tau aburueu da amadodo, wei tarawatui anatapui a voteletelei.”

21 Iesu, tauna i ’nanai ma i vinuavainei ma i riwei, “Kaua tagogi e mamae eġa uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaie. Ma ma nei ma ma votaġotaġoiu!”

22 Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

23 Iesu i ’nana viravira ma ana tauvotaġotaġo awari i riwa, “I piripiri kaua da purapura ravana, God ana au vigulau ina rui.”

24 Tauvotaġotaġo riwana i baiei maranai Iesu we-nanare i babani. Ma Iesu i riwa me, “Natunatu! I piripiri kaua da purapura ravana,* God ana au vigulau ina rui. 25 I telatela kaua da ġamoġamo ġaeġaena wavana kamel, iġoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

26 Taui i vinuanaina ma ai nota i kwa. Ma taui ava i babani vivira i pa, “Mepa da nanare; amapo ai ai lawana mamae-nonoana ina vaia?”†

27 Iesu awarii i ’nana ma i riwei, “Rava awarii wei kauai i piripiri. Wate eġa God awarina. God awarina aiwai anatapuna i telatela kaua.”

* **10:24:** Wei riwana buka ġelau awarii e mamae ma ġelau eġa purapura ravana. † **10:26:** Mai Jew i notai da rava vipurapurai lamna BADA ana verena ana nuavaina matairana, taui e notai da BADA, rava vipurapurai eġa ina gagaloei, tauna ravai ġelau maiteni eġa ina gagaloei.

28 Ma Peter i riwei, “Ma tauai menanare? Tauai ai purapura a voterei ma tam a votaḡoim.”‡

29 Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaḡotaḡoiu; tau ma Riwana Aiaina aubaina. 30 Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anatapui ina maḡa. Rava ina rau-iviapoapoelem; aubaina tam, tau au Tauvotaḡotaḡo da mara au murina tauna lawana mamae-nonoana ina vaia. 31 Wate maḡamaḡau marina e vivinao; tau i ina vimuri. Ma maḡamaḡau da e vivimuri; ina vinao.”

Iesu ana iraḡe babanina i vitonui

(Matthew 20:17-19; Luke 18:31-33)

32 Iesu, ana tauvotaḡotaḡo maiteni i ḡeḡae au Jerusalem. Iesu, tau i au naoi i nena. Tauvotaḡotaḡo i baiei. Ma rava ḡelau i au muri i nenei i rovo kaua. § Ma tau i 12 i rauḡorei au ririva ma i raukarei da kaua amapo da awarina ina tupua; tau i vieḡei 33 I pa, “Ona inana, tauta ta ḡeḡae au Jerusalem. Ma Rava Natuna ina verenei pirisi babadai; ma tarawatu babadai awarii. Ma tau i ana iraḡe ina vianinei. Ma Mai Jentail ina verei. 34 Ma tauna ina vijiboḡi ma ina ovai ma ina kwapui

‡ 10:28: Peter i ḡoei da ita aramanei da tauvotaḡotaḡo ai au iraḡe maiana aiwai, ina vaia. § 10:32: Iesu i ḡeḡae au Jerusalem ma rava maḡamaḡau i viḡaviei ma lamna aubaina ana tauvotaḡotaḡo i baiei da tauna tepana i tora da weka i nena. Rava ḡelau i votaḡotaḡo, tau i rovo kaua da aiwai awarina ina tupua maranai i ḡeta au Jerusalem.

ma ina viraḡeni. Au pom vitonuina ina vomairi me.”

James ma John ai vibaḡa
(Matthew 20:20-28)

³⁵ - Zebedi natunatuna James ma John i nei Iesu awarina ma i vibaḡai i pa, “Tauviararamana! Tauai ai ḡoana a vivibaḡei uta kauai.”

³⁶ Iesu i riwa i pa, “Aiwai o ḡoeḡoei ana kauai aubaimi?”

³⁷ Tau i paribelana, “Ma verelai da ana kiala, tagogi au oiem ma ḡelauna au kelakelaum am au vigulau.”

³⁸ Iesu i paribelei, “Taumi eḡa ota aramanei aiwai o vivibaḡei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoui?*

³⁹ I paribelei, “Tauai tagotagogina!”

Iesu i riwei, “Iniviara kelakana anina ona umai ma ona iraḡe me tau ana iraḡe. ⁴⁰ Wate tau au rewapana eḡa ita mamae da ana veremi da mepa ona kiala au oieu bo au kelakelau. God, rava i vinevinei; tau ai gabu i vokaukauai.”

⁴¹ Maranai Tauvotaḡotaḡo 10 ḡelau, wei riwana i nonori. Tau James ma John awarii i ḡaiawa.

⁴² Ma Iesu, tau anatapui i ḡorei da awarina ma i riwei, “O aramanei da jentail ai babada, dobu ḡela

* **10:38:** ...babataito me tau ina babataitoui tau iniviara ma iraḡe e bababaniei, maranai Iesu au Gethsemani i raraupari muriai da ana iraḡe tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelaḡai.

ravai jentail awarii e mamae-ḡaeḡae ma e rarau-iviapoapoelei. Wate tau i babada ḡaeḡaei, ai re-wapana i ḡetelera da ai rava e vibadebadei da ai ḡoana e kaukauei. ⁴³ ✨Wate au tauvotaḡotaḡo eḡa nanare. Eḡa da aiai i ḡoei da ina ḡetelara taumi au poumi; tauna anina da ina vitaunola. ⁴⁴ Aiai i ḡoei da ita vinao. Tauna ina vitaunola rava anatapui aubai. ⁴⁵ Ma nanare Rava Natuna eḡa ita nei da tauna, tana nolei. Wate ita vitaunola rava aubaii. Ma ana lawana ita verenei da rava maḡamaḡau ai lawana ita gimara-melei.”†

Iesu, rava mata-potapotana Batimeus i vilawani (Luke 18:35-43)

⁴⁶ Ma tau i ḡeta au Jeriko. Iesu, ana tauvotaḡotaḡo, patara ḡaeḡaena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamgigimana. ⁴⁷ Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu’apoapoeleu!”‡

⁴⁸ Rava maḡamaḡau, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapoeleu!”

⁴⁹ Iesu i tumairi ma i pa, “Ona ḡoreiai!”

Anina tau, mata-potapotana i ḡoreiai i pa, “Tepam ina tora ma ma vomairi! E ḡoreḡorem!”

✨ **10:43:** Mrk 9:35 † **10:45:** Iesu i vinuapoapoe ma iraḡe aubaita me Isaiah i girugirumia nanare au Isa 52:13-53:12. ‡ **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariaga nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)

50 Tauna, ana puru i tawanei ma i vomairi laḡilaḡina ma i nei Iesu awarina.

51 Iesu i paridadana i pa, “Aiwai u ḡoei ana kauei aubaim?”

Mata-potapotana i paribelei, “Tauviararamana! A ḡoei da ana inana me.”

52 Iesu i riwa, “Ma nae! Am tumaḡana i vilawanim.” Maratagogi tauna i ’nana me ma Iesu au eta i votaḡotaḡoi.

11

Iesu i rui au Jerusalem

(*Matthew 21:1-11; Luke 19:28-40; John 12:12-19*)

1 Ma maranai Jerusalem i tuḡereḡerei ma i rui au Betphagi ma Bethani* au ola *Olives*. Ma ana tauvotaḡotaḡo ruaḡa i paritawanei, 2 ma i riwei i pa, “Ona nae au melagai au naomi. Maranai o ruirui, kampa *donki* natuna ḡaubo, raḡiraḡitana ona nelaḡai. Tauna eḡa aiai ita gerudadanei. Ona rupeni ma ona neiai.† 3 Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ḡoeḡoei ma maratagogi ina paritawana-melei.”

4 Ma i nae ma *donki* ḡaubona au doa au metaeta raḡiraḡitana i rupeni. 5 Rava ḡelau kampa i maimairi i paridadana i pa, “Aiwai o kaukauei *donki* ḡaubona o ruperupeni?”

* **11:1:** Eng. Bethphage & Bethani. † **11:2:** Mai Jew awari, *donki* lamna nola aubaina ma eḡa gulau ana anigeru. *Donki* i gerui lamna e ririweta da tauna gulau ana nuaubana ma vilamolamona i nei.

⁶ Ma i paribelei me Iesu i ririweia nanare ma tau i voterei da i nae. ⁷ Tau i *donki* i neiai Iesu awarina ma ai puru au uporana i tawana-epai ma au tepana Iesu i kiala. ⁸ Ma rava maḡamaḡau, ai puru au eta i ebani ma ḡelau, ai rugurugu i tarataraia i ebani. ⁹ Tau i vivinao ma tau au muri i nenei i garara:

“Hosanna!”‡

“Viviaiainana tauna BADA au wavana e nenei!”

¹⁰ “Viviaiainana amata David ana vigulau e nenei!”

“*Hosanna* au aidamo telarana!”

¹¹ Iesu i ḡeta au Jerusalem ma i rui au Tempol ma anatapuna i tuvireirei ma au i biga aubaina, i opu me au Bethani, tau i 12 maiteni.

*Iesu, damala aina i parivai-irairaḡeni
(Matthew 21:18-19)*

¹² Ma marana i tom, tau i Bethani i opu-tawanei ma Iesu am-iraḡe. ¹³ Au weia ma damala aina i 'nanai ana ruguruguna. Ma i nae da ita inanai da i ua bo eḡa. Maranai kampa i ḡeta, eḡa aiwai ita nelaḡai. Anina ai ruguruguna ava, aubaina eḡa damala ana mara. ¹⁴ Iesu, damala aina i riwei i pa, “Eḡa aiai amadodo ma amapo anom ina am-melei!” Ma ana tauvotaḡotaḡo i nonori aiwai i latoni.

*Iesu, taugimara tempolei i viaḡaḡana-opunei
(Matthew 21:12-17; Luke 19:45-48; John 2:13-22)*

‡ **11:9:** Lamna pona Aram anona ma vilawaniai ma muriai lamna viegualau ma vimae-ḡaeḡaena aubaina.

15 Maranai tau i ġeta au Jerusalem, Iesu i rui Tempol garina au orana ma taugimara i viaġaġana-opunei, mane tauviraina§ ai kepakepa ma gabubu taugimareina ai anikiala i vitauvirai. 16 Ma i viġaei da eġa aiai ana gimara Tempol au orana ita avarainaiei. 17 ✨Ma rava i viararamani i pa, “I girugirumia nanare,

‘Au numa ina ġorei pari numana
dam anatapui au dobu aubaii.’

Wate taumi o vovirai da kwalakwalai ai guba.”*

18 Pirisi Babadai ma tarawatu Babadai i nonori ma i ogei da ita viraġeni. Tau i, Iesu i rovoei aubaina patara ana viararamana i baiei.

19 Ma au bigai Iesu ana rava, Jerusalem i oputawanei.

Damala aina i poi

(Matthew 21:20-22)

20 Ma ubaubanai tau i nenaie ma damala aina i ‘nanai anatapuna i poi. 21 Peter i notai ma i riwa “Tauviararamana ma inana! Damala aina u parivai-irairaġenia i poi.”

22 Iesu i paribelei, “God ona vitumaġaneil
23 A ririwana-kauemi. Rava wei olana ita riwei,
‘Ma vomairi ma au boga ma tawanem!’ Ma nuanuana eġa ina raġaraġa ma ina vitumaġana

§ 11:15: Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13). ✨ 11:17: Isa 56:7 * 11:17: Iesu dobuġela manena tauviraina ma gimara ravai i viwavui da tau pari numana i vovirai da amkwalakwalai ai guba, tau rava ai arua nolana e viviaopapoeni Jer 7:11-15.

da aiwai e ririweia, ina tupua. ²⁴ Lamna aubaina a ririwemi. Aiwai ami au pari o vibaḡei, ona vitumaḡana da taumi boiboḡi o vaia ma ina viḡarimiei. ²⁵ Ma maranai e raraupari, au naona rava anapui ai ḡo'apoapoe awarim ma notatawanei. Ma nanare amam au mara am ḡo'apoapoe ina nota-tawanei.”†

*Jew babadai, Iesu ana vibadana i vitarapiriei
(Matthew 21:23-27; Luke 20:1-8)*

²⁷ Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina. ²⁸ Ma i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kauai?”

²⁹ Iesu i paribelei i pa, “Au vitaraviravira tagogi ana terei ma ona paribeleu. Ma ana riwemi; aiwai vibadanei wei kauai a kaukauei. ³⁰ Aiai, John taubabataito vibadana i verei da rava ita babataitoi, God bo rava? Ona riweul!”

³¹ Tau i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina eḡa ota vitumaḡanei?’ ³² Wate eḡa tana riwa da, ‘Ravei.’ Tau rava i rovoei, aubaina rava anapui, ai nota da John anina peroveta. ³³ Ma i paribelei, “Tauai eḡa ata aramanei.” Iesu i riwa, “Tau nanare eḡa ana riwemi aiwai vibadanei wei kauai a kaukauei.”

† **11:25:** Riwa wadubo nonoana uraiei i girugirumia vs 26 weka eḡa ita mamae, Mepa da rava ai apoapoei eḡa ma nota-tawanei, amam au mara nanare am apoapoei eḡa ina nota-tawanei.

12

Tauipi ai awanaina (*Matthew 21:33-46; Luke 20:9-19*)

¹ ✨Iesu i vikarei ma awanainei awari i babani i pa, “Mara tagogi oroto, ana wapu i kauēi ma grape i paewi* ma i gari ma grape anigudana ma violaḡa numana i voai. Ma tauipi ḡelau i verei da ita nolei tau i anatapui aubai. Ma i vaḡai au dobu ḡela. ² Tuaruta ana mara i ḡetai ma taniwaga, ana taunola i paritawanei tauipi awarii da ana ḡuta ita vaia. ³ Wate tauipi, tauna i vojijini ma i kwapui ma kwakwavina i paritawanei. ⁴ Ma taniwaga, taunola ḡelauna i paritawanei. Ma tau, kolana i viaibauni ma i vitepaubaubai. ⁵ Ma taunola ḡelauna i paritawanei ma tauna i viraḡeni ma i maḡa ḡelau i paritawanei, ḡelau i kwapui ma ḡelau i viraḡeni. ⁶ Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Tau, natu ina vivirei.’ ⁷ Wate tau, tauna i ’nanai ma i riwa vivira i pa, ‘Wei taniwaga natuna. Ona nei, tana viraḡeni ma ana buderi ina viḡaritaie!’ ⁸ Ma i vunui ma i viraḡeni ma tupuana wapuei i tawanana-opunei.

⁹ –Wapu taniwagana marina aiwai ina kauēi tau awarii? Tauna ina nei ma tauipi ina viraḡeni ma grape wapuna ina veredamanei tauipi ḡelau awari. ¹⁰ Wei girumana o iavi bo eḡa?

‘Wei ḡaimana, tauvoa i geduaiei,

wate muriai i nelaḡai da tauna ḡaima kaua.

✨ **12:1:** Isa 5:1-2 * **12:1:** Parivainota wadubona, God au anatapuna Israel e bababaniei me tauna ana grape wapuna, me Isa 5:1-2.

11 *Wei lamna, BADA ana kaua ma inanana i vinualaulauna.” (Psalm 118:22-23)*

12 Jew babadai i aramanei da awanaina lamna tau i bababaniei ma i gōei da ita pani. Wate tau i patara i rovoei, lamna aubaina Iesu i voterei ma i nae.

*Caesar awarina tax tana terei bo eḡa?
(Matthew 22:15-22; Luke 20:20-26)*

13 Ma Pharisi ḡelau i ma Herod ana rava ḡelau i nae Iesu awarina da riwei ita waroi. 14 Tau i nei ma i riwa, “Tauviararamana, tau i aramanei da tam rava jijimanim. Ma rava wavai naenaei ma rava labalababa eḡa uta vibainaenaei ma anapui e vaivaia da tagogi. Wate tam God ana babani riwa kau e viararamani. Ma riwai tax tana terei Rome gulauna wavana Caesar† awarina, i aii bo eḡa?”

15 Wate Iesu, ai moru i 'nana-bauni ma i riwei, “Aiwai aubaina o raudadaniu? Mani tagogi ona neiai da ana inanai!”

16 Denarius tagogi i neiai Iesu awarina ma tau i vitara-virevirei, “Wei aiai aruana ma wavana?”

I paribelei, “Caesar.”

17 Iesu i riwa, “Aiwai Caesar ḡarinei, Caesar ona verei. Ma aiwai God ḡarinei, God ona verei!” Ma tau i baiei.

*Sadusi ḡelau, Iesu i vitara-virevirei irairaḡelei vo-mairina aubaina
(Matthew 22:23-33; Luke 20:27-40)*

† 12:14: Sisa.

18 ✨Mai Sadusi ai vitumaḡana da rava eḡa ita vovomairi-me maranai e irairaḡe.‡ Anina ma ḡelau i nei Iesu awarina ma i paridadanei, 19 “Tauviararamana! God ana tarawatu, Moses wenanare i girumi: Mepa da oroto i’raḡe ma kaiababana i netawanei ma eḡa natunatui. Orotovareina kaiababana ina ravaḡi ma roaroa ina ḡuni vareina aubaina. 20 Mara tagogi varevarei seven i mae. Ma natuevou i tavine ma eḡa natunatuna ma oroto i’raḡe. 21 Vareina viruaina kaiababa i ravaḡi ma tauna maiteni eḡa natuna ma i’raḡe. Ma nanare vareina vitonuina. 22 Ma nanare anatapui seven, wavinena i ravaḡi ma eḡa natunatui. Au muriai wavine i’raḡe. 23 Anatapui seven, wavinena i ravaḡi. Vomairi me au marana, lamna aiai awana?”

24 Iesu, tau i riwei, “Aiwai Moses i girumi ma God ana rewapana eḡa ota aramanei. 25 Maranai tau iraḡelei ina vomairi, tau eḡa ina tavine bo ina vitavinei. Wate ina mae me anela au mara. 26 ✨Ma rava iraḡelei ai vomairi babanina, Moses ana tarawatu eḡa ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.* 27 Tauna eḡa rava irairaḡe ai God, wate rava lawalawai ai God.

‡ 12:18: Act 23:8 † 12:18: Sadusi tau gulagulau ma rava ḡaeḡaei mai Jew ai giu babadai tau maiteni eḡa ita vitumaḡana da anela bo arua ḡelau e mamae ma buka 5 i vinoa, Moses i girugirumia, tau lamna ava e vivitumaḡanei (Karena, Exodus, Leviticus, Numbers, Deuteronomy). Ma eḡa buka ḡelau. Wate Moses ma BADA riwaie i tau i viatataie da lawana e mamae iraḡe au murina. ✨ 12:26: Exo 3:6

Taumi o moru kaua!§”

Tarawatu ġeġetelarana

(Matthew 22:34-40; Luke 10:25-28)

²⁸ Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua, lamna aubaina tauna i vitara-viravira, “God ana tarawatu metauna i ġetelara?”

²⁹ ✧ Iesu i paribelei, “Geġetelarana tagogi lamna wei: *Ona rautaniġana Israel! BADA ata God, tauna ava BADA.* ³⁰ BADA ami God nuanuami ina vaia orami anatapunei ma aruami anatapunei ma ami nota anatapunei ma ami rewapana anatapunei!

³¹ ✧ Ma viruaina lamna wei: *Rava ġelau nuanuam ina vaia me tam nuanuam e vaivai-melei!* Wei tarawatu ruāġa i ġetelara, eġa me ġelau nanare.”

³² Tarawatu badana i riwa, “Tauviararamana u babani kaua! Riwa kaua u babaniei, BADA *Tauna ava God ma eġa mepa ġelauna.* ³³ Ma nuanuami ina vaia orami anatapunei ma ami nota anatapunei ma ami rewapana anatapunei. Ma, *Rava turam nuanuam ina vaia me tam nuanuam e vaivai-melei.* Wei tarawatu ruāġa lamna i ġetelara, eġa me pulo apuapunana bo pulo ġelau.”

³⁴ Iesu i ’nanai da tauna i paribelana kaua ma i riwei, “Tam, God ana vigulau au ġereġerena e ġeġeta.” Ma eġa aiai tepana ita tora da Iesu ita vitara-viravirana-melei.

Keriso tauna aiai?

(Matthew 22:41-46; Luke 20:41-44)

§ **12:27:** ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tau lawalawai maranai BADA, Moses awarina i babani. ✧ **12:29:** Deu 6:4-5 ✧ **12:31:** Lev 19:18

³⁵ Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna?
³⁶ ☆ Arua Vivivireina, David nota i verei ma tauna i riwa:

‘MAMAE-NONOANA *au gulau i riwei,*
Au oieu ma kiala
da am gavia
au ae karem da ma tuvaidoedoei.’ (Psalm
110:1)

³⁷ –David, tauoina wei gulauna i gōrei *bada*. Ma menanare da badana lamna, David natuna?” Patara gāeḡaena riwana i nonori ma i vinuai.ia.

Iesu, Tarawatu Babadai ai kaua i babaniei
(Matthew 23:1-36; Luke 20:45-47)

³⁸ Ma Iesu, tau i viararamani i pa, “Tarawatu babadai ona rovoei. Ai gara manamanai ma e bababara nae au deba da rava tau i e vivivirei.
³⁹ Tau i anikiala vinevinei pari au numana ma au torela, gabu aia i e vaivaia. ⁴⁰ Tau i, kaikaiababa e morumorui ma ai numa e kwalekwalei, e morumoru ma e raraupari-vai-manamanawa. Tau i ai kovoḡa ina apoapoe guratana.”

Kaiababa ana pulo
(Luke 21:1-4)

⁴¹ Ma Iesu, pulo aniterenana au baba ḡelauna i kiala ma rava i nananai mane i tereterei. Rava maḡamaḡau i vivimanei, mane maḡamaḡau i terei.
⁴² Wate kaiababa molamolakana i nei ma mane muomuoi ruaḡa i terei, ruvana i aburu kaua. ⁴³ Ana tauvotaḡotaḡo i gōrei ma i riwei, “Anina a ririwemi, wei kaiababa molamolakana i tere-guratei, eḡa me

☆ **12:36:** Psa 110:1

taui ġelau. ⁴⁴ Taui ġelau ai maurei i verena, wate wei kaiababa molaka ma ġarinei anatapuna i terei, ana anilawana anatapuna.”

13

*Iesu i riwa da rava God ana Tempol ina rikai
(Matthew 24:1-2; Luke 21:5-6)*

¹ Iesu, Tempol i nene-tawanei ma ana tauvotaġotaġo tagogi i riwa, “Tauviararamana! Numa i viġulau ġaġa ma numa ġaimai i rata ġaġa.”

² Iesu i paribelei, “Wei numai ġaeġaei u inanai, eġa ġaimai tagogi, turana au tepana ina mae. Ġaima anatapui ina rikai.”

*Rava ina vinuapoapoe kaua. Iesu ana tauvotaġotaġo ina vipatutu
(Matthew 24:3-14; Luke 21:7-19)*

³ Iesu i kiakiala au ola *Olives*, Tempol au nanavanaveġela ma Peter, James, John ma Andrew i nei ma i vitaraviravirana govaġei ⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

⁵ Iesu, taui i riwei, “Ona inana kaua da eġa aiai ina terevaideġaimi! ⁶ Rava maġamaġai, wavauei ina nei ma ina riwa, ‘Tau Keriso tauvilawana!’ Ma rava maġamaġai ina terevaideġai. ⁷ Ma maranai viġavia ona nonori ma viġavia aueia riwana ona nonori; eġa ona rovo! Wei kauai anina da ina tupua, wate wei eġa damona. ⁸ Dam, damai ina viġavia vivira ma dobu, dobuai ina viġavia vivira. Ma lolo ma gomara dobu au anatapuna. Wei kauai, lamna me wavine ana iniviarra e vivikarei maranai e vivinatuna.

9 —Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaḡotaḡoiu. Ma tauī awarii, Riwa Aiaina ona raugugulei. 10 Riwana Aiaina ona raugugulei rava anatapui awari ma muriai damona ina nei. 11 Ma maranai i panimi ma i etaremi. Eḡa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eḡa taumi ota babani, wate Arua Vivivireina. 12 Rava, vareina ina verenei da ina viraḡeni. Ma ama, natunatuna ina verenei da ina viraḡeni. Ma roaroa, amamai ma aloloi ina viḡaviei da ina iraḡe. 13 Rava anatapui ina geduaiemi tau aubaiu. Wate aiāi da e maimairi-jijina da au damona, tauna ina lawana.”

*Iniviana ḡaeḡaena ana mara
(Matthew 24:15-28; Luke 21:20-24)*

14 “Maranai ‘Kaua apoapoe kaukauana’* e maimairi mepa avena ita mairi. (Buka tauīavana wei ina aramanei anona aiwai). Tauī aiavoi au Judea ina ruba laḡilaḡina au ola. 15 Aiāi numa au tepana eḡa ina ḡaira bo ina rui au numa da aiwai ina vaia. 16 Aiāi au wapu eḡa ina naeme au numa da ana gara ina vaia. 17 Ma iniviana ḡaeḡaena, waivine duaduamai ma tauī da e viviḡuḡu awari nai au marana! 18 God awarina ona raupari da wei kauai eḡa au bodu ina tupua. 19 ✧Ma nai au marana amapo iniviana ḡaeḡaena. Ma maranai God dobu i kauei, iniviana ḡaeḡaena eḡa nanare ita tupua ma

* 13:14: Eng. *Abomination of Desolation* Dan 9:27 11:31 & 12:11

✧ 13:19: Da 12:1

amapo eġa nanare ina tupua me. ²⁰ Wate BADA nai marana ina vitupoi. Mepa da eġa ina vitupoi, rava anatapai ina iraġe. Wate rava, tauna ana vinevine ina vilawani lamna aubaina mara ina vitupoi.

²¹⁻²² —Muriai keriso tauvilawana morumorui ma peroveta morumorui ina nei ma mataira ma kaua babai ina kauai ma ina kauana dadanei da God ana vinevine maiteni ita terevaideġai. Lamna aubaina mepa da aiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina eġa ona vitumaġane! ²³ Ona inana kaua; anatapuna a riwana-nonoemi!”

Rava Natuna ana nei
(*Matthew 24:29-31; Luke 21:25-28*)

²⁴ Iesu wenanare i riwa, “Ma iniviara ġaeġaena au murina.

Madegā eġa ina rarana
ma nawaravi eġa ina lalai. (Isaiah 13:10)

²⁵ *Ma ubona marei ina peu*
ma rewapana ġelau au aidamo ina gui. (Isaiah 34:4)

²⁶ ☆—Nai maranaina, *Rava Natuna ana rewapanana ma ana borumana apauei ina nei.* ²⁷ Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ġela au damona.”

Damala ana awanaina
(*Matthew 24:32-35; Luke 21:29-33*)

²⁸ “Damala aina ana awanaina ona aramanei. Maranai ai e numonumoi, lamna ona aramanei da maura e tuturiai. ²⁹ Ma nanare, maranai wei kauai anatapai ina tuputupua, ona aramanei da

Rava Natuna i turiai; au metaeta i ġetai. ³⁰ Anina a ririwemi da wei kauai au naona ina tupua ma muriai da rava marina lawalawaii ina irage. ³¹ Mara ma dobu ina amoa. Wate riwau eġa ina amoa.”

Bada ainelana ana nei i aramanei
(*Matthew 24:36-44*)

³² “Ma eġa aiai ita aramanei nai marana bo madeġa aiwai ina nei. Anela au mara eġa ita aramanei ma Natuna eġa ita aramanei. Amana, tauna ava i aramanei. ³³ Ona vineneġana ma matami ina kala!† Eġa ota aramanei mara aiwai, wei kauai ina tupua. ³⁴ Wei me rava ana numa i netawanei ma i vaġai. Ma ana taunola nununai i terei da ita vipaipai ma tagotagogi ava ai nola i verei da ita kauai. Ma tauvineneġana i riwei da ita vineneġana. ³⁵ Ona vineneġana! Eġa ota aramanei mara aiwai, numa taniwagana e nenei; mepa da au bigai bo au nubautuva bo maratomtomi bo ubaubanai. ³⁶ Ma eġa matamatavemi ina nelaġaimi. ³⁷ Aiwai riwana a ririwemi, riwana tagogina rava anatapui a riwei, ona vineneġana!”

14

Jew ai babada, Iesu i ogei da ita viragei
(*Matthew 26:1-5; Luke 22:1-2; John 11:45-53*)

¹ ✨Au pom ruaġa muriai da Raġona ma Palawa Bagibagina torelai,* Piriſi babadai ma Tarawatu

† **13:33:** Wedau Evanelia i girumi, ma i raupari, wate buka wadubo nonoana wei eġa ita mamae, Luk 21:16 kampa ona inanai da e mamae.

✨ **14:1:** Exo 12:1-27 * **14:1:** Raġona (passover) Exo 12:1 Palawa eġa yist maiteni (Unleavened-Bread) Exo 12:17 & 23:15

Babadai eta i baibaiei da menanare govagovaḡanei Iesu ita vunui. ² Ma i riwa, “Au torela wei kauai eḡa tana kauei, mepa da viḡaiḡaiawa ḡaeḡaena ina tupua.”

*Wavine, daji ḡabuḡabuna Iesu au kolana i waḡi
(Matthew 26:6-13; John 12:1-8)*

³ Maranai Iesu au Bethani, Simon i ḡoreḡorei lepeleperana ana au numa i kiala ma i aman. Wavine, wagi wavana alabaster i voai ma i ḡeta ma wagi uana i vogai ma daji ḡabuḡabuna, maiana ḡaeḡaena e ḡoreḡorei *nard*, Iesu au kolana i waḡi. ⁴ Rava ḡelau kampa i mamae i ḡaiawa ma i riwa, “Aiwai aubaina daji u vikalokaloei? ⁵ Wei dajina ita gimarei 300 *denarii* † ruvana ma manena molamolakai ita verei.” Ma tauī, wavine i vienenei.

⁶ Wate Iesu i riwa, “Ona voterei! Aiwai aubaina o vinuabolai? Tauna, kua aiaina awariu i kauei. ⁷ Molamolakai awarimi e mamae-nonoa ma ona ḡoei ma tauī ona voagui. Wate tau awarimi eḡa ata mamae-nonoa. ⁸ Wavine ana nola i kauei. Tauna, dajiei tupuau i vokaukauana-nonoei vikokoaga aubaina.‡ ⁹ A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma eḡa nuanuai ina vuru.”

¹⁰ Judas Iskariotei tauna Apasol tagogi, Pirisi Babadai awari i ḡeta da Iesu ita vibenabenamei. ¹¹ Tauī i vinuaiiai kua maranai wei i nonori ma Judas i parivainuaḡani da mane ita verei. Ma Judas i'nana da mepa gavogavo ita inanai da Iesu ita amverenei.

† 14:5: Wei lamna me taubagibagi ana maia madeḡa tagogi aubaina. ‡ 14:8: Mai Jew ai kua da taubeu dajiei e bulobuloi muriai au kokoaga e tereterei.

*Iesu ma Apasol, Raḡona torelana i ani.
(Matthew 26:17-25; Luke 22:7-14, 21-23; John
13:21-30)*

¹² Ma Palawa Bagibagina torela ina vikarei. Maranai sipu orotoi ḡauboi e vunuvunui Raḡona torelana aubaina. Tauvotaḡotaḡo, Iesu i paridadanei, “Mepa u ḡoeḡoei Raḡona torelana ana vokaukauei aubaim?”

¹³ Iesu, tau i ruaḡa i riwei ma i paritawanei, “Ona nae au Jerusalem ma oroto, waira wagina e avavarai ona inana ma ona votaḡotaḡoi. ¹⁴ Au numana e ruiruiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaḡotaḡo maiteni Raḡona torelana ana ani?” ¹⁵ “Ma tauna, numa vatavatara ina viatataiemi i vokaukauana-nonoei ma kampa aubaita ona vokaukua.”

¹⁶ Tauvotaḡotaḡo i nae au Jerusalem ma i ririweia nanare i nelaḡai ma Raḡona torelana i vokaukauei.

¹⁷ Au i biga ma Iesu i nei Apasol maiteni. ¹⁸ Tau i kepa kepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

¹⁹ Tauvotaḡotaḡo i vinuabola ma tagotagogi ava i pa, “Eḡa tau tapa?”

²⁰ Iesu i paribelei, “Taumi tagogi weka palawa e vivigaloi au aboma tau maiteni. ²¹ Wariaga i girugirumia nanare, Rava Natuna ina iraḡe. Wate aiai da Rava Natuna i vibenabenamei; tauna, kovoḡa ḡaḡaena ina vaia! I aii da alona avena ita vinatunei.”

²² Maranai i amam ma Iesu palawa i vaia ma i viegualau, i vogimagimai ma Tauvotaḡotaḡo i verei ma i riwa, “Ona vaia; wei tupuau.”

²³ Anina ma *wine* kelakana i vaia ma i viegualau ma i verei da anatapui i umei, ²⁴ ☆“Wei tau tarau i toi rava maḡamaḡau aubai ma au parivainuaḡana bagibagina ina vovai-virewapani. ²⁵ Anina a ririwemi, *wine* eḡa ana uma-melei da maranai God ana rava aubaii ana vigulau.”

²⁶ Ma taui voepaepa welana i ravi ma i ḡae au Ola *Olives*.

Peter, Iesu ina boviei
(*Matthew 26:31-35; Luke 22:31-34; John 13:36-38*)

²⁷ Iesu, tau i riwei “I girumi nanare, God i riwa, ‘*Tauviḡamoḡamo ana virāḡeni ma sipu ina vilamonei.*’ (*Zekariah 13:7*)
Ma nanare anatapumi ona ruba-tawaneu. ²⁸ Wate au vomairi au murina ana aivinao au *Galili*.”

²⁹ Peter i riwa, “Mepa da anatapui ina rubatawanem, wate eḡa tau!”

³⁰ Iesu, Peter i riwei, “A ririwana-kauem da amadodo waguvarai muriai da kokorereko ina tou mara ruaḡa; tam mara tonuḡa ma bovieu.”

³¹ Wate Peter, ponana i bagibagi ma i riwa, “Avena mepa da tau, tam maiteni ana iraḡe. Eḡa melanai ana boviem!” Ma taui ḡelau riwana tagogina i latoni.

Iesu au Gethsemani i raraupari
(*Matthew 26:36-46; Luke 22:39-46*)

³² Ma au Gethsemani i ḡeta ma Iesu, ana tauvotaḡotaḡo i riwei, “Weka ona kiala ma ana raupari.”

³³ Ma Peter, James ma John i taravaini ma nu-anuana i’raḡe ma nuanuana i bola-kauei. ³⁴ Ma

☆ **14:24:** Exo 24:8; Jer 31:31-34

taui i riwei, “Au nuabola i rata kua au orau da e vunuvunui. Weka ona mae ma ona vineneḡana.”

³⁵ Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei. ³⁶ I riwa i pa, “*Abba* Amau! Aiwai anapuna tagotagogina tam awarim. Wei kovoḡa kelakana ma vaitawanei. Wate eḡa tau au ḡoana, wate tam am ḡoana.”

³⁷ Ma Iesu i nememei ma tau i tonuḡa rarau-nuavurui i nelaḡai. Ma Peter i riwei, “Simon!Š tam aiwai matavena? Mara aburuna uta vineneḡana bo eḡa?” ³⁸ Ma Iesu, tau i riwei, “Ona vineneḡana ma ona raupari da eḡa au raelara ona peu! Arua e ḡoeḡoei, wate tupua i ḡokokokara.”

³⁹ Ma i naeme ma parina tagogina i raupariei. ⁴⁰ Maranai i nememei ma i nelaḡai, i matamatave; tau, matai i vitai. Ma tau eḡa ita aramanei aiwai ita riwei.

⁴¹ Mara vitonuina i nene-memei ma tau i riwei, “Taumi amapo ona matamatave ma laumi ina tautau? Anina! Mara i ḡetai, ona inana. Rava Natuna ina vibenabenamei ḡo’apoapoe ravai au urai. ⁴² Ona vomairi; tana nae; ona inana! Tauvibenabenameu e nenei!”

Iesu i pani

(Matthew 26:47-56; Luke 22:47-53; John 18:3-12)

⁴³ Iesu i bababani ma Judas, tauna ana Tau-votaḡotaḡo tagogi i ḡetai. Tauna, patara ana apiai maiteni i nei. Piriſi Babadai ma Tarawatu Babadai ma dogadogara, wei ravai i paritawaneiai. ⁴⁴ Muriai

Š **14:37:** Au Mrk 3:16 Simon wavana i virai da Peter.

da Iesu awarina ita ġeta; Judas, patara ai mataira i verei, “Orotona ana vigia laġolaġonei; nai tauna. Ona pani ma ona naiei ma ona inana-kauei!”

⁴⁵ Maranai Judas i ġeta ma i nae Iesu awarina ma i riwei, “Tauviararamana!” Ma i vigia-laġolaġonei. ⁴⁶ Ma tau, Iesu i vojijini ma i pani. ⁴⁷ Ma tagogi kampa i maimairi, ana sword i taina-lavui ma Pirisi ġeġetelarana ana taunola taniġana i borituini. ⁴⁸ Ma Iesu, tau i riwei, “Taumi ana apiami o nei da ota panu bo, apamina tau amkwalakwalau? ⁴⁹ Marana patapatai taumi maiteni ta mamae au Tempol ma a viararamana ma eġa ota panu. Ma i girugirumia nanare, ina tupua.”

⁵⁰ Ma Tauvotaġotaġo anapui, Iesu i voterei ma i ruba-tawanei.

⁵¹ Ma laraga tagogi, i vikareko ma Iesu i votaġotaġoi. Tau i ġoei da ita vojijini, ⁵² wate ana kareko i vojijini ma tauna ana kovakovana i ruba.

Tau, Iesu i etarei.

(Matthew 26:57-68; Luke 22:54-55, 63-71; John 18:13-14, 19-24)

⁵³ Ma tau, Iesu i naiei Pirisi Ġeġetelarana. Pirisi Babadai, dogadogara ma Tarawatu Babadai mepa i vitagogieiana. ⁵⁴ Ma Peter i votaġotaġo da Pirisi Ġeġetelarana ana numa. Ma ana au debadeba, purusimani maiteni i kiala ma i viviairara. ⁵⁵ Pirisi Babadai ma mai Jew ai boru ġeġetelarana,* Iesu ana apoapoe i baiei da ita viraġeni; ma i baiana-avei. ⁵⁶ Matamata

* **14:55:** Mai Jew e ġoreġorei Sanhedrin.

maḡamaḡau, Iesu i viwavu-morumoruei, wate ai viwavu taputapunei ava.

⁵⁷ Ma ḡelau i vomairi ma wei wavuna moru-moruna i kauē Iesu awarina, ⁵⁸ “Tauai a nonori tauna i riwa, ‘Wei tempolna i voavoai. Tau ana rikai ma au pom tonuḡa au murina, Tempol ḡelauna ana voai ma lamna eḡa rava ita voai.” ⁵⁹ Wate nanare ai viwavu taputapunei ava.

⁶⁰ Pirisi ḡeḡetelarana i mairi tau i naoi ma Iesu i vitara-virevirei, “Wei ravai e viviwavuim ma eḡa aiwai ma paribelei bo?”

⁶¹ Ma Iesu i genuana ma eḡa ita paribelei.† Ma Pirisi ḡeḡetelarana i vitaraviravirana-melei, “Tam Keriso tauvilawana bo? Viviaianana Natuna bo?”

⁶² ✨ Iesu i paribelana, “Tau tauna! Ma *Rava Natuna ona inana, Vivirewapanana au oiena ina kiala ma mara ladanei ina nei.*

⁶³ Pirisi ḡeḡetelarana, amlona i ḡaiḡai ma ana gara i sikai ma i riwa, “Aiwai aubaina matamata ḡelau tana ḡoei? ⁶⁴ Taumi, vijiboḡa o nonori ma ami nota aiwai?”

Tau i anapui i riwa, “Tauna ana ḡo’apoapoe aubaina anina da ina iraḡe!”

⁶⁵ Ma ḡelau i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipapai, Iesu i vaia ma i vunui.

Peter, Iesu i boviei
(*Matthew 26:69-75; Luke 22:56-62; John 18:15-18, 25-27*)

† **14:61:** Isaiah i parivereta da Keriso ana au iraḡe eḡa ina gagaloana-melei. (Isa 53:7). ✨ **14:62:** Da 7:13

66 Ma Peter au gabaura i mamae ma Pirisi ġeġetelarana ana taunola guguini i ġetai. 67 Maranai tauna, Peter i 'nanai i viviairara; ma i 'nana-tunutunui ma i riwa, "Tam maiteni Iesu Nasaretei, ana tauvotaġotaġo!"

68 Wate tauna i bovi ma i riwa, "Eġa ata aramanei aiwai e bababaniei, a vinuanainei!" Ma i tuopu au metaeta ma [kokorereko i tou‡].

69 Taunola guguini, Peter i 'nanai ma i raukarena-melei ma rava au ġereġere i maimairi i riwei, "Wei ravana, tau i tagogi!" 70 Wate Peter i bovi me.

Mara aburuna muriai, tau i au ġereġere i maimairi, Peter i riwana-melei, "Tam anina, tau i tagogi; aubaina tam, Galiliei!" 71 Ma Peter i riwa, "God au matana, tau a ririwa kua, ravana o ririweia a vivinuanainei!"

72 Maratagogi kokorereko i tou mara viruaina ma Peter, Iesu riwana i notai - *Muriai da kokorereko ina tou mara ruaġa, tam mara tonuġa ma boviu.* Ma Peter i vinuabola kua ma i tou.

15

Iesu i taravaina-naiei Pilate au naona

(Matthew 27:1-2, 11-19; Luke 23:1-5; John 18:28-38)

1 Ubaubanai boiboġi, pirisi babadai ma dogadogara ma tarawatu babadai anatapui i viboru* ma i vianina da Iesu i pani ma i veredamanei Pilate au urana. 2 Pilate, Iesu i vitara-virevirei i pa, "Tam mai Jew ai gulau bo?" Iesu i paribelei i pa, "Anina e ririwa nanare." 3 Pirisi Babadai e viviwavuim

‡ 14:68: Wei riwana buka au wadubo nonoana eġa ita mamae.

* 15:1: Mrk 14:55 Sanhedrin

kaua maḡamaḡau i aubai. ⁴ Ma nanare Pilate, Iesu i vitaravirana-melei i pa, “Tam ma paribelana bo eḡa? Ma nonori e viviwauim kaua maḡamaḡau aubai!” ⁵ Wate Iesu i genuana ma eḡa ita paribelei. Ma Pilate i ba kaua.†

Iesu ana iraḡe i vianinei

(Matthew 27:15-38; Luke 23:13-25; John 18:39-19:16)

⁶ Tau i ai kaua maemaena da Raḡona Torelana au marana, Pilate, panipani tagogi, rava ai ḡoanei e ruperupeni ma e vovoterei da e nena. ⁷ Oroto tagogi wavana Barabas; tauna Rome gabemani i viḡaviei ma i pani da panipani au numana i mamae. Ana rava maiteni tauviraḡena. ⁸ Ma patara i ḡeta da Pilate ita vibaḡai da panipani tagogi ita rupeni Raḡona Torelana au marana. ⁹⁻¹⁰ Pilate i paribelei, “Taumi o ḡoeḡoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina. ¹¹ Wate Pirisi Babadai, patara i egari da Pilate, Barabas ita rupeni ma eḡa Iesu. ¹² Pilate, patara i paridadana-melei i pa, “Tauna o ḡoreḡoreia mai Jew ai gulau mena ana kauanei?” ¹³ Tau i garara, “Ma tuparatui!” ¹⁴ Pilate i riwa, “Aiwai apoapoena i kauai?” Ma tau i garara guratana, “Ma tuparatui!” ¹⁵ Pilate i ḡoei da patara ita vinuaubai ma Barabas i rupeni ma *sorodia* i egari da Iesu i kwapui da i vitaratarai ma i naei da ita tuparatui.

† **15:5:** Mai Rome ai tarawatu e mamae da maranai i viwauim ma tauetara eḡa uta paribelei lamna tam anina wavu ma varai.

*Sorodia, Iesu i vinamei
(Matthew 27:27-31; John 19:2-3)*

¹⁶ *Sorodia*, Iesu i taravaina-ruiei Pilate ana au numa ma ai rava ḡelau i ḡoreiai. ¹⁷ Ma gara lebalebarina‡ [*me gulau ana gara*] Iesu i vioteni ma kunuteia ai donadonanei i viri da au kolana i terei. ¹⁸ Ma vinamana i raukarei ma i garara, “Egualau mai Jew ai gulau!” ¹⁹ Ma kolana gonuei i raviravi ma i ovaovai. Ma ae-tutuiei i mae-ḡaira au doa ma i raudunelei ma i vivinamei. ²⁰ Ma i vijiboḡa vorovei ma gara lebalebarina i voḡiḡi-tawanei ma ana gara i vioteni. Ma i taravaina-opunei da ita tuparatui.

*Iesu i tuparatui
(Matthew 27:32-44; Luke 23:26-43; John 19:17-37)*

²¹ Tau i nenaē ma Simon i nelaḡai, rava Sairinie§ (tauna Rufus ma Alexander amai). Simon wapeuei i nenei. Ma *sorodia*, tauna i egari da Iesu ana *korosi* i avarai. ²² Tau i Iesu i naiei da gabu i ḡoreḡorei Golgotha, lamna anona unu gabuna. ²³ *Sorodia*, *wine* bunama *myrrh* maiteni i virai ma Iesu i veredadani, wate tauna i geduaiei. ²⁴ Ma Iesu i tuparatui ma ana gara, tau i ava au orai i ḡutai.*

²⁵ Ubaubanai 9 kilok nanare, Iesu i tuparatui. ²⁶ Aniviwavuna i girumi ma i tutui, “Mai Jew ai gulau.” ²⁷⁻²⁸ ☆ Danedanenei ruaḡa, Iesu au ririvana

‡ 15:17: Eng. purple. § 15:21: Eng. Cyrenian. * 15:24: Tau i ḡaima i tawanei me dice da aiai aiwai garana ita vaia. ☆ 15:27-28: Isa 53:12

i tuparatui; tagogi au oiena ma ġelauna au kelake-launa.†

²⁹ ✧Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuġa ma voa-melei. ³⁰ Ma vilawana-melem ma *korosiei* ma ġairai!”

³¹ Ma nanare Pirisi Babadai ma Tarawatu Babadai maiteni, Iesu i vivinamei, “Rava ġelau i vilawani, wate ainelana ita vilawana-melana-avei. ³² Keriso Tauvilawana, Israel ana gulau; marina *korosiei* ma ġairai ma tana inana da tana vitumaġanei!” Danedanenei i tupatuparatui maitenai, Iesu i vinamei.

Iesu ana iragħe

(Matthew 27:45-56; Luke 23:44-49; John 19:28-30)

³³ Ma au benai dobu anapuna i waguvarei da 3 kilok au bigai. ³⁴ Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*” ³⁵ Ma rava ġelau i au ġereġere i maimairi i nonori ma i riwa, “Ona rautaniġanei, Elijah e kwatukwatuei!” ³⁶ Ma rava tagogi i ruba da gara ai au damona i pani ma au *wine* tomatomana i vigoaloi ma i voepai Iesu au ipirina ma i riwa,‡ “Ona vipaipai ma tana inana mepa da Elijah ina nei da ina tereġairei.” ³⁷ Ma Iesu ponana i rata ma i kwatu ma i lavutu tawanana. ³⁸ Ma Tempol

† **15:27-28:** Giruma ġelau waduboi vs 28 e mamae Ma aiwai i kaukaueia lamna peroveta i ririweia i tupua, Tau i 'nanai me tau i go'apoapoe taukauei. Isa 53:12 ✧ **15:29:** Mrk 14:58 ‡ **15:36:** Psa 69:21 peroveta i girumi da Keriso ita verei.

au orana aniteregāgāra au pouna i wanasikai au tepana da i gāira au doa. ³⁹ Ma *sorodia* ai bada, Iesu au naona i maimairi; i 'nanai da i lavutu tawanana ma i riwa, “Wei anina God Natuna.” ⁴⁰ Waivine gēlauri aueia i mae ma i raraubiga: Mary Magdalene ma Mary (James keikeina ma Joses§ aloi) ma Salome. ⁴¹ Taui, Iesu i votaḡotaḡoi ma i vovoagui maranai au Galili i mamae ma waivine gēlauri maḡamaḡauri, tauna maiteni i gēgāe au Jerusalem, anatapui kampa.

Iesu i vikokoagei

(*Matthew 27:57-61; Luke 23:50-56; John 19:38-42*)

⁴²⁻⁴³ Ma au biga i tuturiai Joseph Arimatheaei* tauna rava gāeḡaena tagogi boru gētelarana au orana. Tauna God ana vigulau ana nei i vipaipaiei. Ma vokaukaua marana (Lamna Sabat au naona)† ma Joseph ana tepatorana, Pilate awarina i rui ma Iesu taubeuna i vibaḡei. ⁴⁴ Pilate i baiei da Iesu boiboḡi i'raḡe. Tauna, *sorodia* ai bada i kwatuei ma i vitara-virevirei da Iesu i'raḡe bo eḡa? ⁴⁵ Maranai *sorodia* ai bada i parivere i da anina riwa kaua. Ma Pilate, Joseph i riwei da Iesu tupuana i vaia.

⁴⁶ Joseph, gara maiana gāeḡaena i gimara i ma Iesu tupuana i tere-gāirei. Gare i umai ma au guba

§ **15:40:** Au Mat 27:56, Matthew i girumijoseph ma eḡa Joses.

* **15:42-43:** Eng. Arimathea. † **15:42-43:** Mai Jew ai Sabate, madeḡa e neneulai au Friday e vivikarei da madeḡa e neneulai au Saturday e kwakwa. Mai Jew ai Tarawatu e ririwa da rava i'raḡe lamna marana tagogina ina doboi. Sabate amadodo madeḡa e neneulai ina vikarei lamna aubaina Joseph i volaḡilaḡina da Iesu taubeuna ita doboi.

tupuana i vimataveni ma gāima gāeḡaena i kaipeuri da kokoaga metaetana i viaitomeni. ⁴⁷ Mary Magdalene ma Mary - Joses alona i 'nanai mepa Iesu taubeuna i vimataveni.

16

Iesu i vomairi

¹ Ma Sabat au murina, Mary Magdalene ma Mary - James keikeina alona ma Salome, bunama ḡabuḡabui i gimarai da inaiei da Iesu tupuana ita buloi.* ² Ma Sunday ubaubanai boiboḡi maranai madeḡa igogogo, tau i nae au kokoaga. ³ Ma i nenaē ma i bababani, “Aiai aubaita gāima kokoaga au metaetana ina kaipeura-tawanei?” ⁴ Maranai tau i taepai, i 'nanai da boiboḡi gāima i kaipeura-tawanei - gāima gāeḡae kaukauana. ⁵ Maranai i rui au guba ma oroto laragana ana gara ararapoirina i 'nanai au oiena.† Ma tau i orai i auepai. ⁶ Orotō laragana i riwa, “Eḡa orami ina auepai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eḡa weka! Tau i weka taubeuna i vimataveni. ⁷ ✠ Marina ona nae ma ana tauvotaḡotaḡo ona riwei, ma Peter eḡa nuanuami ina vuru da Iesu e vivinao au Galili. Kampa ona inana i ririwemi nanare.” ⁸ Tau i opu ma kokoagei i viruberubei ana ini sisisi ma ana rovoi. Tau i rovo kaua, lamna aubaina eḡa rava ita riwei.

* **16:1:** Mai Jew ai kaua maemaena da taubeu monamonei ina buloi ma muriai ina doboi ma waivine i ḡoei da wei kauai ita votaḡotaḡoi. † **16:5:** Tupua i vimataveni au oiena i kiakiala, ana gara ararapoirina. ✠ **16:7:** Mrk 14:28

Mark 16:9-20

Mark Riwana Aiaina damona lamna wariāga i vine-boai. Ma rava gēlauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i ega

⁹ Iesu iraḡelei i vomairi me au Sunday ubaubanai boiboḡi ma i ainae da Mary Magdalene awarina i ega. Maraotai Iesu, Mary awarina arua-apoapoei seven i viopuni. ¹⁰ Iesu, ana tauvotaḡotaḡo i vivinuabola ma i toutou ma Mary iḡeta da i pariverei. ¹¹ Ma Mary i pariverei da Iesu i lawana me ma tauna matanei Iesu i 'nanai. Wate tau i ega ita vitumaḡanei.

Iesu, tauvotaḡotaḡo ruaḡa awari i ega

¹² Wei au murina Iesu inanana tapuna ma ana tauvotaḡotaḡo ruaḡa awari i ega; maranai tau i nena au melagai. ¹³ Tau i naeme ma tauvotaḡotaḡo ḡelau i vieḡei. Wate tau nanare ega ita vitumaḡanei.

Iesu, Taii 11 awari i ega

¹⁴ Muriai tau i 11 i amam ma Iesu awarii i ega. Ma i eni aubaina tau orai i bado ma ega ita vitumaḡana maranai rava, i riwei da Tauna i vomairi me. ¹⁵ ✧ Iesu ana Apasol i riwei, "Ona nae dobu au anatapuna. Ma God Riwana Aiaina ona jimei rava anatapui awarii. ¹⁶ Aiai da i vitumaḡana ma i babataito; tauna ina lawana. Ma aiai da ega ita vitumaḡana ina kovoḡi. ¹⁷ Ma tau aiavoi da i vitumaḡana, rewapana ina verei da kaua babai ina kauei. Ma arua-apoapoei ina viopuni ma pona

✧ **16:15:** Act 1:8

tapunei ina babani. ¹⁸ Tauī, mota uraiei ina vaia ma waiawa ina umai ma eġa ina rauputei. Ma urai doridoriai au kolai ina terei ma ina lawana.”

God, Iesu i ġaiei au Mara

¹⁹ ☆BADA Iesu, awari i babani vorovei. Ma tauna i ġaiei au mara ma God au oiena i kiala. ²⁰ Tauvotaġotaġo i opu ma dobu au anapuna i raraugugula. Ma BADA, tauī i voagui ma kaua babai i kaukauei da tauvotaġotaġo aiwai i bababaniei i vovai-virewapani.

Wedau Mark
The Gospel of Mark in the Wedau Language of Papua
New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 22 Feb 2024 from source files dated 31 Aug 2023

aa19f3e3-98fb-51fa-9c53-3906edc75f11